

張燕公集二





張 燕 公 集

(二)



張 說 文

張燕公集卷九

表

請許王公百官封太山表

臣說等言。臣聞聖人者。與天地合德。故珍符休命。不可得而辭。鴻名盛典。不可得而讓。陛下功格上天。澤流厚載。三五之盛。莫能比崇。登封告成。理協幽贊。故符瑞必臻。天意也。書軌大同。人事也。菽粟屢登。和平也。刑罰不用。至理也。今陛下稽天意以固辭。違人事以久讓。是和平而不崇昭報。至理而闕薦祖宗。億兆之情。猶知不可。況上帝臨照。祖宗顧諭。其可止乎。願納王公卿士列岳縉紳之衆望。迴命有司。速定大典。臣等不勝懇禱。敢昧死再拜上言。

請八月五日爲千秋節表

臣聞聖人出。則日月記其初。王澤深。則風俗傳其後。故少昊著流虹之感。商湯本元鳥之命。孟夏有佛生之供。仲春修道祖之籙。追始尋源。其義一也。伏惟開元神武皇帝陛下。二氣含神。九龍浴聖。清明總於玉靈。爽朗冠於金天。月維仲秋。日在端五。恒星不見之夜。祥光照室之朝。羣臣相賀誕聖之辰也。焉可不以爲嘉節乎。比夫曲水禊亭。重陽射圃。五日綵綻。七夕粉筵。豈可同年而語也。臣不勝大願。以八月五日爲千秋節。著之甲令。布於四方。羣臣以是日獻甘露醇酎。上萬歲壽酒。王公戚里。進金鏡緩帶。士庶以結絲

承露囊更相遺問村社作壽酒宴樂名賽白帝報田神上明元天光啓大聖下彰王化垂裕無窮異域古風同見美俗

請置屯田表

臣說言臣聞求人安者莫過於足食求國富者莫先於疾耕臣再任河北備知川澤竊見漳水可以灌巨野淇水可以溉湯陰若開屯田不減萬頃化萑葦爲稻稻變斥鹵爲膏腴用力非多爲利甚溥諺云歲在中酉乞漿得酒來歲甫爾春事方興願陛下不失天時急趨地利上可以豐國下可以廩邊河漕通流易於轉運此百代之利也當今國儲未贍邊軍未息勸人農業願留聖意亦嘗賜前階之食承後騎之顧竟唯唯而無一言者豈敢隱情於聖主也正以職在仗衛憂於部伍馬上非公議之所徇遊非朝廷之事今昧死上愚見乞與大臣籌謀速下河北度支及溝渠使檢料施功不後農節謹附賀正使隨軍前曹州考城縣尉同希再奉表以聞謹言

禮儀使賀五陵祥瑞表

右臣等伏以陛下孝通天地親朝五陵拜橋陵則紫氣見獲白兔甘露降白鵠巢天光清和日色明朗拜定陵則有景雲見甘露降拜獻陵則甘露被樹祥雲抱日拜昭陵則先聖見神遊薦享之際陛下親聞欵息初進服用樂器自然發聲又素像圓面甘露降滋從祀先臣歷聞蹈舞拜乾陵則有靈草生甘露降日抱戴之瑞此皆陛下虔誠上感神靈福降四海同懽萬方忭躍臣等幸陪大禮親覩禎祥無任大慶之至

謹奉表陳賀以聞臣說謹言

集賢院賀太陽不虧表

太史奏太陽不虧聖德上感變災爲瑞陽光增輝陰慝不作休徵之美莫盛於斯臣等無任欣忭之至謹進狀陳賀以聞謹進

賀大衍歷表

臣說言伏以開元大衍歷天旨裁其紀綱日官考其精要履端更始敬授維新加以辨五行之序推七精之數明徵聖期寔光上德臣又見梁天監中陶宏景著玉匱記云盛德木子以肇來運頃者僧一行推璿衡歷得皇家天命成數千年古今祥兆若合符契歷數既在於聖躬卜年又表於長歷莫大之慶獨冠前王臣忝跡儒林預聞昌運無任抃躍之至謹奉表陳賀以聞

賀示歷書表

臣說等言內侍尹鳳祥至奉宣聖旨內出新撰歷書二十五卷以示臣等竊窺深奧仰觀英華涉海登山罔知攸際臣聞唐堯光宅順昊天而定四時虞舜登庸在璿衡而齊七政伏惟開元聖神皇帝陛下至德廣運文明濬哲道冠生知與神合契備往聖之能事紹昔王之盛典發揮易象以應乘乾之時考正歷書更表履端之始上包二帝下括三王徵晷運之盈虛究推步之疎密備稽氣象載蹠坎離三辰順軌而更明五緯合度而增煥是使天地貞觀神人允諧唐虞舊章於斯重覩臣等幸陪書府得預朝門抃躍之情

實萬恒品奉表陳賀以聞。

賀祈雨感應表

臣說言。臣聞水旱常數。堯湯固有聖賢之理。恭潔爲難。自冬踰春。積陽成亢。陛下以時災繫政。人患由君。退巫女之雩。却應龍之請。陛下躬自暴露炎景。瞻仰雲漢。推心引誥。爲人受咎。誠旣發而動天。言尅期而降雨。今已霖霪三日。澤漏重泉。草樹含欣。郊原變色。加以雲平雨細。氣潤風和。豈惟優渥王畿。必將周遍天下。羣心舒釋。聖情開暢。無任萬姓歡悅之至。謹奉表陳賀以聞。

讓兵部尚書平章事表

臣說言。伏奉九月十九日制書到并州。授臣兵部尚書。同中書門下三品。王人在門。驛騎臨路。奉恩循分。以慙以惕。臣說中謝。臣早以書生射策。載筆聖朝。晚以軍誌典兵。秉旄乘塞。祿非授進。寵是宸衷。久侍玉階。四掌綸誥。一心好直。三黜其宜。今復用之。猶夫人也。何足以舉明邦政。光緝帝猷。更策疲驥。來塵法駕。又臣已受命司籍。專意簡書。所希散冗。因閒就業。忽叨劇職。責大憂深。人心有限。事難兩濟。國史無成。臣執其罪。上思薦賢以自代。下願守分以全節。竊見開府宋璟。清介獨立。倚法而不回。詹事陸象先。清明向道。臨事能斷。其高明有素。歷朝之所仗委。其積行無疵。家人之所體信。揆停住任。未盡宿誠。乞迴此恩。以納來効。必能補舊政之缺漏。廣前途之軌轍。雖深心用力。臣頗與二子齊驅。然校德考年。彼皆有一日之長。天下者累聖之公器。宰相者萬方之具瞻。臣所以廷讓彰言。不陳密啓。伏願聖恩。聽輿論而舉衆望所矚。

倘朝任得人實海內幸甚無任力微任重惶懼之至謹奉表陳讓

讓封燕國公表

臣說言伏奉今月七日制書封臣燕國公食封三百戶寵靈猥及中心如惔臣說中謝臣聞至道之時重法守義上無無功之賞下無無德之祿故授受禮全而踰越不起伏惟陛下光撫宇內大寧天域百廢維新萬靈翹注建侯疏壤允答元功臣亦何人首膺是命自古有道而爵說經而封蓋以訓蒙成聖資師通學臣之侍講有異前聞何者大明朝昇螢爝無助時雨夕濡浸灌焉施幸得依附光景游泳渥澤豈敢虛承啓發之恩謬荷將就之報且如人臣之義二則爲罪一心不回愚知之分譬如犬馬有不背之性草木有不彫之理知何德於天壤而欲蒙造化之偏施哉臣之無功正與此類叨恩過量終懼且慙乞迴聖慈以容介節無任惶悚之至謹詣朝堂奉表陳讓以聞

讓中書侍郎表

臣說言伏奉制書除臣中書侍郎寵命俯臨驚魂自失臣說中謝臣聞雲構鬱起非枳棘之任天波暴集寧溝澗所容臣識無通方文不經國南宮華省已忝前行西垣內閣將陪近侍心慙官謗跡愧時流何以承掌主言贊決機務當今二儀再造百度皆新太平之基惟賢是與混成庶政責在中書豈以常才敢膺首選乞寢恩命改擇時髦惟慎庶官以諧僉議無任懼款之至謹詣朝堂奉表陳讓以聞臣所讓人別狀封進

讓右丞相表

臣說言伏奉制書除臣右丞相兼中書令臣學慙稽古早侍春官階緣舊恩忝竊樞近雖思致君堯舜而才謝伊臯屬升中大封方求俊乂猥升端右實愧朝行乞停新令獲守舊職辭納情懇希垂察諒無任屏營之至謹奉表陳讓以聞

第二表

臣說言伏奉今月十日制書除臣尚書右丞相恩命自天戰踴無地臣說謝臣少長儒門鑿鑿墳史才非高格官不因人徒以命偶龍興位階鴻漸五入西掖七踐南宮中間拙延謫放直招玷缺傷矢之禽聞弦虛墜賜環之客聽歌先泣此則魂爲危感氣由懼奪安可重收廢器再辱端揆何以師長禮闈正持憲府當今典章革故風教鼎新野無四隱朝有三傑具瞻之地願擇時髦臣幸沐遺簪墮履之恩好生養志之德朝遊簡牘暮對圖書受賜無涯循榮過分豈更干處士之橫議招匈奴之遙哂艾骨自瘡負乘致寇雖則愚情懷戀覩冒求寵亦望聖慈限約令度餘年願停今授長守舊史罄陳肝膽非敢飾讓謹詣朝堂奉表自乞臣說誠惶誠恐頓首頓首死罪死罪謹言

讓中書令表

臣說言伏奉今月十一日制授臣中書令恩渥自天震越無地臣說謝伏惟陛下至孝安親大功定國六合翹首庶政惟新雍熙之化望在茲日中書理本臣叨首名將何以翊贊聖君光澤天下自臣攝官禁掖

已涉七旬不知賢才以舉是不仁也不辯不肖以退是無勇也何足以備乎宰臣胡顏冒恩復受真拜臣之愚執正在於此不敢繁詞以塵聖聽乞迴榮授改擇時髦無任懇款之至謹詣朝堂奉表陳讓以聞臣所讓人別狀封進

讓平章事表

臣說言臣伏奉宣旨制書以臣同中書門下平章事承命戰汗拜舞失容臣說誠惶誠恐頓首頓首死罪死罪臣本書生器識凡近仕不望於通貴祿只宜於代耕蒙時寵榮越踐臺閣局心守職竊所庶幾長算經邦則無逮及伏以廟堂寄切軍國務殷循涯審分非臣攸處爲國者爲官擇人爲臣者陳力就列若志小謀大力微任重豈敢顧惜微軀實恐上塵王政是以披露肝膽不暇飾詞乞停此授俯遂誠情無任怖懼慙惶之至謹詣朝堂奉表陳讓以聞

讓起復除黃門侍郎表

草士臣說言臣私門凶咎喪紀未終不自毀滅苟存聖代忽降制書復臣工部侍郎尋奉後命授臣黃門侍郎震駭失圖哀怖殞絕臣說誠惶誠恐頓首頓首死罪死罪臣弱年早孤母氏訓立得紹基構忝列簪裾從官歷年晨昏多闕播遷遠裔離別又苦顧復無答報養何追心所摧感語不能喻甫至冬中禮及祥禪今已春暮瞻言幾何是臣事朝廷日長戀几筵日短乞寢嚴命許達私情訴衷祈天所望殆遂無任荒迫之至謹朝詣堂路左奉表乞哀以聞謹言

第二表

草土臣說言臣在疚承榮布哀陳欵精誠無感天曉未廻假喘殘生悲懼轉集臣說誠惶誠恐頓首頓首死罪死罪臣聞苦者不覺聲哀窮者貴其言達情有至切辭無敢隱臣爲少子慈愛所鍾每一離別輒加憂憫況臣生年多故遠隔私庭終堂之日身限公事存旣數遠左右沒復不畢几筵痛心自傷特殊人類臣今望延數月企及再期乞恩無多報國非晚冒死重請冀蒙哀遂無任懇迫之至謹詣朝堂路左奉表陳乞以聞

第三表

草土臣說言臣荒喘窮情再瀆旒辰懇誠不到未感天心誓將冒死祈恩分外中謝臣本書生門非代祿數葉單緒族無親房臣父遭憂曾祖未葬臣有兩兄一妹甥姪九人又有中表相依尙成百口吉凶衣食待臣以辦臣今拜職黃閣侍奉丹墀厚祿清班一朝改官舉宗榮賴爲幸過甚人情所欲豈合稽恩正以焚炎海晨出晚歸貽慮非一況涉危難傷心幾途追計生平倍增摧慕侍養日少違離日多卽臣母憂臣以終身臣其忍服縗以從事情既不同常例望在特降殊恩臣先患風緩近加虛瘦陛下倘從臣數月容過再期非但寬其哀疚固亦全其生理亡身報國庶竭後圖木植有性枉之則折人願在心違之則苦雖強爲用將何以堪銜泣仰天冀蒙哀允無任懇迫之至謹詣朝堂路左奉表陳乞以聞

謝觀唐昌公主花燭表

臣說言內侍尹鳳祥宣勅賜臣觀唐昌公主花燭伏以天下嫁王宰送行苟非榮寵何階瞻望臣免歸餘叟忽承朝請之恩廢駕羸驂復覩肅雖之禮鴻私所被枯瘁生光無任歡荷之至謹奉表陳謝以聞

諫內宴至夜表

臣聞上天示下災祥將以誘導人主先王仰觀休咎亦以順修政教易曰天垂象聖人則之言天人之際感通必矣臣伏見去年十月十七日月滿猶望應虧不虧今月十七日亦未少虧此易常之異也夫月者至陰之氣臣下之象當助天作明順期盈缺若過盛逾時盈縮乖度得非臣下之咎而上天之誠耶伏願陛下深察熟思而預防臣又見近日內宴夜深方罷小臣無識抑所未安王在在鎬凱樂飲酒此誠大雅之美也臣卜其晝未卜其夜此蓋春秋之義也伏願陛下宴樂之餘不及於夜臣職忝補闕昧死陳愚謹言

進鬪羊表

臣說言臣聞勇士冠鷄武夫戴鶡推情舉類獲此鬪羊遠生越雋蓄情剛決敵不避強戰不顧死雖爲微物志不可挫伏惟陛下遷良家於六郡求猛士於四方烏無遁材獸不藏技如蒙効奇靈囿角力天場却鼓怒以作氣旋躡躅以奮擊跌若奔雲之交觸碎如轉石之相叩裂骨賭勝濺血爭雄敢毅見而衝冠驚狠聞而擊節冀將少助明主市駿骨揖怒蛙之意也若使羊能言必將曰苦鬪不解立有死者所賴至仁

無殘量力取勸焉。臣緣損足未堪履地謹遣男駢馬都尉垍謹詣金闕門陳進輕冒宸嚴伏深戰越。

進佛像表

臣說言去年行塞至朔州忍辱尼寺見有高祖太宗造金像銀趺刻題尊號彼州士女屢瞻佛光臣懇思聖心如在咫尺伏以皇帝事業遠存荒塞拯溺救焚身勤慮苦歸誠佛寶何神不據信知功遍區域澤周生人心憑神靈躬履危險故皇天眷命奄有邦家後嗣聖人欽承大寶所當思由積德而興帝系本艱難而成王業先聖一心奉佛者蓋爲百姓求福也陛下爲繼文之主實創業之功再廓氛祲重安廟社垂統萬億同符祖宗夫惟興王必藉佐命咸有一德克享天心書曰非天私我有商惟天佑于一德非商求于下民惟民歸于一德功臣同德可不念哉物有小而感深事有微而傳遠臣謹將金像隨表奉進謹言

進渾儀表

臣說言臣聞迎日授時莫先於歷象先天成務必歸於制作伏惟開元神武皇帝陛下建中立極緯武經文至德難名神功莫測於是定歷成歲立象考天紹唐堯欽若之文繼虞舜在璿之義上皇能事於斯備矣臣書院先奉勅造游儀以測七曜盈縮去年六月造畢進奏又奉恩旨更立渾儀臣等准勅令左衛率府長史梁令瓚檢校創造於是博考傳記舊有張衡陸續王蕃錢樂之等並造斯器雖渾體有象而不能運行事非經久旋即毀廢臣今按據典故鑄銅爲儀圓以象天使得俯察上具列宿赤道周天度數注水激輪令其自運一日一夜天轉一周又別立二周輪絡于天外綴以日月令得運行每天轉一匝日行一

度月行十二度十九分度之七凡二十九轉有餘而日月會三百六十五轉而行匝仍置水橫以爲地平令儀半在地上半在地下晦朔弦望不差毫髮又立二木人於地平之上前置鐘鼓以候辰刻每一刻則自然擊鼓每一辰則自然撞鐘皆於櫃中各施輪軸鉤鍵交錯關鎖相持轉運雖同而遲速各異周而復始循環不息陰陽不能逃其數度分不能隱其時究天地之回斡極乾坤之變化斯皆上稟聖謨旁獲神助臣等愚思非所能及望錄付史館宣示百寮使知告成之功迴越前古無任勤懇之至謹隨表奉進以聞臣說誠惶誠懼

幽州論戎事表

臣說言伏以先帝以臣踐履忠孝使臣啓發聖明故得侍讀春闈夙承天眷洎於中歲兼掌樞密內當沸騰之口外禦傾奪之勢陛下監撫旣安白天所佑然臣叶贊之意神明啓之開元之始首典鈞軸智小任大福過災生出守三州遠離六載曲直非已升降由人惟君知臣事不待說今旣牧邊鎮委重戎麾竊以兩蕃共和能識同異九姓遠聞撫納欲恃賊殺無侵擾之慮保兩蕃受徵發之期臣愚料之恐未然矣何者賊殺新立必逞兵所加必收九期若去兩蕃搖失九姓雖屬并州節度然其幽州密邇脫有風塵何所不至臣熟聞幽州兵馬寡弱卒欲排比未可卽用城中倉糧全無貯積事未逼迫臣寔憂之伏乞聖慈深以垂意博詢舊將豫爲籌畫事若早圖必無後悔且孤臣總衆易起猜嫌寃大失濟事之宜嚴整招怨讐之誘遠辭天聽臨事回惶如有論告臣身奏劾軍事者乞追臣面問對定實虛則日月無可蔽之期幽遠

有自通之望。伏乞留書在內。時加矜察。

張燕公集卷十

表

并州論邊事表

臣說言臣說頓首死罪死罪言臣聞小忿不忍延起大患小罪不寬迫成大禍契丹奚背恩誠負天地不容之責然原其狀本是兩蕃君臣不和自相誅戮耳伏望聖慈且使其族類在朝者將勑書再三告讓因其所欲立酋長而更定之或可不戰而定也必告之不訓則大發兵馬東召靺鞨西舉九姓來春未青數道齊入單于之首可拾而取未爲晚也天恩若不忍以中國勞事蠻夷則嚴兵備塞棄兩蕃如糞土耳又許欽淡擁二萬餘兵據五丈之城有糧卽守不可拔無糧卽鼓而行何所慮也今遣史獻非時遠抄近掠其實甚難萬一未捷賊氣轉壯下臣愚昧不敢隱情伏望聖恩再加裁度臣說誠惶誠恐頓首頓首

百官請不從靈駕表

臣某等言伏以靈駕首途聖思攀從國計非便羣情不安冒昧上祈未蒙哀允跪拜還旨載深惶惕臣某等誠惶誠恐頓首頓首死罪臣聞古者天子上法天心下極私情不違衆欲以順人理國爲孝以克己制心爲禮是故凡聖異禮公私殊制私心獨展凡人之孝萬姓感善聖人之孝也陛下行堯舜之事以萬姓爲心奈何守曾閔之節懷獨展之願臣等囂囂竊所未曉且永淳以後關輔流散近適旋定人猶未足今

山陵起築役徒摠萃彌春涉夏爲費宏多若陛下此行羣司畢從於人取給臣實難之水旱小憲農慮非淺東都則水漕淮海易資監穀之蕃陸走幽并近壓戎夷之便朝命新復人望在安宜應靜鎮未可移動陛下若俯順羣願留撫都人則其安若此如不勝私情攀奉靈駕則其慮如彼況扈從兵馬旣不預集行宮廩蓄又未先備發期甫爾支計闕然倉卒敦迫必不堪辦若待陵寢旣安霜露終感三農歲稔萬乘時巡奉園廟以展虔瞻日月以何遠今固將抒私戀棄羣言忘人力費國用此實非陛下安集新業之圖亦恐非先后憐憫遺人之意且朝廷故事典章猶在獻陵追遠太宗不至于三原昭陵上遷高宗不至于九鑿豈先帝私懷不堪故事羣臣公議之所奪也伏願仰遵舊訓顧定新基屈至性而順羣情抑小節而成大孝使軍國長算咸洛皆安邦甸窮人賦斂少減萬姓翹望實深至願百寮結誠期於死請無任悲迫之至謹詣朝堂奉表固請以聞

爲留守奏慶山醴泉表

臣某言臣聞至德洞微天鑒不遠休徵祕景時和則見是知縣代曠歷慶牒祥經帝王有必感之符神靈無虛應之瑞伏惟天冊金輪聖神皇帝陛下金鏡御天璿衡考政欽若元象宏濟蒼氓茂功將大造混成純化與陽和俱扇朝百神之樂職宅萬國之懽心嘉氣內充涇雨外息豈止搖風紀月之草列蒔於階除儀簫銜籙之禽相鳴於戶閣而已固有發禎厚載抽貺泉源表元德之潛通顯黃祇之昭報臣於六月二十五日得所部萬年縣令鄭國忠狀云六月十四日縣界霸陵鄉有慶山見醴泉出臣謹差戶曹參軍孫

履直對山中百姓檢問得狀其山平地湧拔周迴數里列置三峯齊高百仞山見之日天晴無雲異風雲之遷徙非崖岸之騫震歛爾隆崇巍然翕鬱阡陌如舊草樹不移駿益地之祥圖知太乙之靈化山南又有醴泉三道引注三池分流接潤連山對浦各深丈餘廣數百步味色甘潔特異常泉比仙漿于軒后均愈疾于漢代臣謹按孫氏瑞應圖曰慶山者德茂則生臣又按白虎通曰醴泉者義泉也可以養老嘗出於京師禮斗威儀曰人君乘土而王其政太平則醴泉湧潛潭巴曰君臣和德道度協中則醴泉出臣以五行推之六月土王神在未母之象也土爲宮君之義也水爲智土爲仁水伏于土臣之道也水相干君子之佐也今土以月王而高水從土制而靜天意若曰母王君尊良臣善相仁化致理德茂時平之應也臣又以山爲國鎮水實利人縣有萬年之名山得三仙之類此蓋金輿景福寶祚昌圖邦固不移之基君永無疆之壽自永昌之後迄于茲辰地寶屢昇神山再聳未若連巖結慶並泌疏甘羣瑞同區二美齊舉高視古今曾無擬議信可以紀元立號薦廟登郊彰貲德齡渝衍萬宇臣辱司京尹忝寄留臺牧西夏之疲人荷東蕃之餘寵游泳鴻沛神禧嘉祉物感有歸光啓茲部喜覩殊觀實百恒流踴躍一隅馳誠雙闕伏請宣付史館頒示朝廷無任鳬藻之至謹遣某官進圖奉進

爲留守奏瑞禾杏表

臣聞天微地杳惟聖能通物寶靈禧在德斯感伏惟天冊金輪聖神皇帝陛下覆翼萬方植生羣類化行至道風流太和白耀青光日月之瑞赤文元甲手河洛之符既慶溢于山泉又嘉賁於草木臣今月三

日得所部萬年縣令鄭國忠狀言縣界內霸陵鄉新出慶山南出醴泉北岸有瑞杏三樹再葉重花嘉禾三本同莖合穗臣謹差司兵參軍鄭味元檢覆皆實臣謹按孫柔之瑞應圖曰嘉禾者五穀之長也王者德茂則生昔炎帝教治人心而嘉禾秀周公理合天道而嘉禾豐臣又以事可理推物有類驗蜀桑異葉李定知其有祥漢木奇枝終軍以爲無外今植物搖落而瑞杏繁滋所謂仁育之風行於肅殺之序此蓋聖道隆渥靈祚和多朱萼素花彰孝理於詩傳一莖九穎合德耀于祥經曠代殊珍崇朝累集方俟山流石髓杏茂仙林體挹軒漿禾登堯膳受天介福錫帝長齡覲王母於崑臺朝神人於谷口今綠苗尚櫟黃粒未成當須晚秋不獲早獻臣忝尹茲部頻曠洪休抒躍之誠倍萬常品

爲留守作賀崛山表

臣聞山川變見如來有得道之祥國土遠移至人任不思之力伏惟皇帝陛下宏惠福深勤人願滿蓮花授記應上聖之降生貝葉開圖握大雄之寶命司戶參軍孫履直伏承臣奏所部萬年縣新出慶山醴泉乃有天竺真僧於春首獻狀若以梵音所記此是祇闍山恒河沙佛必經林下虛空衆聖堂處巖間隱見外方湧秀中土岑泉可識體類宛然感應十號之尊示見千輪之主此實天威無礙地寶有歸化焜耀於外方湧秀中土岑泉可識體類宛然感應十號之尊示見千輪之主此實天威無礙地寶有歸化焜耀於裁成理窈冥於言說但瞻三山丹壁奄靈鶩而飛來三泉滌池逐神龍而吐沃峯高八百協周室之隆基地得萬年祈皇靈之資始儒書分載望偈希聞加以堅固開林吉祥被草重花瑞杏藻岫紅源九穎嘉禾葱鬱黛壑原臨白鹿識鹿苑之仙遊路邇朱城悟王城之鐘聽方俟迴輿雪嶺厭香積於羣臣沈璧天池

陰靈枝于下國吹法螺而朝玉帛乘瑞象而會天人溢宇流觀殊隣浹慶臣守符京都奉神嶽於郊畿係葉皇柯仰慈雲于油露喜抃之極倍百恒誠

爲留守奏羊乳饗表

臣聞靈感無方每先時以見象神鑒不昧必憑物以示人有德著而休歸或祥來而事應伏惟天冊金輪聖神皇帝陛下端冕馭天舞干柔遠南越瑞貢久通譯而歸仁西域奇山近隨方而應聖臣今月得所部萬年縣令鄭國忠狀送新出慶山下羖羊乳饗一頭狎擾因依動息隨戀如從所產若素同羣理有可嘉事無前例竊以異類相育外方慕化之徵野畜自馴荒服來王之兆必有遠夷企踵歡心百獸之庭獵俗懷音稽額三乘之會臣言可驗翹足是期昔馬或生羊易占得人安之體大時養彘天鏡顯代康之文援此比蹤實爲同貫況復晨飲醴浦夕下靈山翳仙杏之奇花拾嘉禾之餘穗羊禎甚玉饗慶如銀晦朔未移祥符累集福應之盛前古未聞臣忝尹京都屢薦嘉瑞抃躍之至兼倍恆流謹差某官奉表隨進

爲留守奏嘉禾表

某臣言臣聞天聽自人神和在德代非乏瑞罕遇交泰之期福不虛徵必自休明之主伏惟天明金輪聖神皇帝陛下仁覆萬靈孝理四海功罔高於尊祖道莫大于配天嚴備郊禋崇肅宗祀秩百王之禮兼六代之樂化溢膠庠訓優更老政每光于帝籍役不奪于農時嘉氣橫浮祥風紛洒騰文煥色九光連合于貞明逸輦殊輪百寶駢滋於動植臣今月日奉進止告望鳳臺山泉之瑞其日于東山栢城內得嘉禾一

本臣初見衆苗互隴。香穎垂秋。嘉翫繁滋。欲觀稊粒。左右無識。折以呈臣。異其綠葉緩舒。葱芒璧秀。熟視奇狀。乃知嘉祥下則異畝合莖。上又同延雙穗。昔雍熙之代理政之君。雖彞出應特。而生不擇地。未有託根神域。彰孝德之能深。吐秀壽宮。助粢盛之豐潔。此蓋睿誠通感。天佑降祥。中古以來。未覩斯美。臣籍慶宗枝。久沐星潢之潤。躬持瑞穎。預奉天保之符。忭悅之誠。倍兼恆品。

爲清邊道大總管建安王泰失利表

臣攸直言。今日某往峽石山。稱前軍王孝傑等。以某日失利於峽石山。忽聞殞絕。心摧魄死。上孤天威。下慙士卒。死罪死罪。頓首頓首。臣以駑怯。謬職戎麾。銜戴恩榮。統率將士。驅關隴之馬。引淮海之餉。旗幕瓦於邊城。弓甲傾於內府。不堪任使。撓失節度。羣帥無決勝之功。偏師有挫衄之咎。憤結靈祇。怨毒骨髓。臣實其罪。罪非他人。忍恥苟全。遠愧胡顏之責。引慝過死。內負猶鬪之心。踧踏無顏。進退靡處。臣旣不建師律。有干常憲。合卽嚴科。以塞重責。然以見在兵馬。交要部統。未敢束手。軍事委置。旌節稽緩。刑書伏深。競戰特乞。更召嚴猛。代臣統帥。請歸罪司。寇以正國刑。因伏邊陲。唯待斧鉞。

爲建安王謝賜衣及藥表

臣某言。伏奉月日。恩賜臣衣及藥。渥流璿極。彩溢旌門。拜捧戴舞。載欣載越。臣受律虧方。扞城無寄。偏師不振。逋寇仍滋。進慙計日之功。退任踰時之咎。誠合歸罪司。寇以厭深責。豈圖天寵猥臨。宸慈寬假。當從褫服。轉承且吉之衣。宜肆典刑。翻加有喜之藥。毀車夷馬。復振鸞和。窮炭枯莖。重敷榮燭。跼影邊塞。馳心

關城徵命易投，生成難謝。無任感戴。

爲建安王讓羽林衛大將軍兼檢校司賓卿表

臣某言。伏承月日制書除臣右羽林衛大將軍兼檢校司賓卿。朝榮封及恩露洪垂。罄仰驚抃。環揆慙失。臣某頓首頓首。臣席慶皇枝。辱司天衛。素官成責。久盈人口。頃屬山戎自擅。王師震加謬當。推轂之禮竟空。汗馬之績實賴。睿謨幽贊。靈兵潛討。靖烽塵於遼海。卷旌麾於燕蔚。臣得歸功北闕。待罪東藩。沐浴休覲。生死榮幸。安敢賣要塞而告勞。貪天功以爲已。又況羽林清禁。上則星辰主客。命卿下法河海。蓋文武具美。方議望僉歸。豈臣弊劣所堪。戶忝伏乞特迴曉鑒。更擇能賢俾朝。興新樞之歌。臣免伐檀之刺。非敢飾讓。實披誠請。無任悚戴之至。謹詣朝堂奉表陳讓以聞。

爲薛稷讓官表

臣稷言。伏奉制書除臣工部尚書。寵靈俯逮。營魄震飛。揣分何階。戴恩無力。臣某中謝。臣才乏濟川。功微橫章。故以業承薪構澤潤葭莩。効雕蟲之薄技。蒙金蠅之榮飾。徒參進對。愧無好詞。頃以冗職東垣。暫諧清曠。今若統司南省。將招素餐五翟之正。典事斯重。六官之長。求人未易。以臣叨受。實謂非宜。願寢前恩。致命他士。無任悚懼之至。謹詣朝堂奉表陳讓以聞。臣所讓人別狀封進。

爲郭振讓官表

臣某言。臣本書生。幸事先帝。歷踐清職。遂參機密。宗武樹黨。忿嫉正人。猜忌眉睫。構結瘡痏。臣與一二貞

士指天誓心枝梧羣邪捍城王室曉入宮省暮不望歸艱危備嘗幾不免禍日覩一日以逢開泰臣之宿圖今已足矣陛下寶位旣復元良又定凶讎咸剪百度惟新正宜博採屠鈞大變風俗豈臣微才空忝重任外不厭於衆望內實猥於多言但父年老先嬰風疾五月已來不離枕席臣方寸已亂短效無施夙夜在公扶侍有闕乞免官秩歸侍私庭罄心仰恩期於孝治無任懇迫之至

謝修史表

臣某言伏奉今月十六日勅令臣在家修史捧恩戴命且喜且慚臣服道儒門策名昌運掌綸四后載筆三朝階緣宿遇登躡端揆職爲劇於心盡史無用而功廢自貽官謗待罪私門反魯之感徒深藏周之望已絕豈意特流天旨重緝簡書雖才慚左邱而時盛周漢况復編堯舜之年事皆目覩敍義黃之德言匪傳聞善志將訓于百王實錄可貽於千古國家之鴻業辦矣朽臣之至願畢矣不勝天恩難任之至謹奉表附內侍尹鳳祥陳謝以聞

謝賜碑額表

臣說言伏奉今日恩旨賜先臣碑額悲荷交心拜捧以泣臣某中謝臣亡父先臣隴安貞下位不待昌辰先帝贈之以嵩城陛下目之以積善光賁重渥感慶三泉舉宗悲喜外姻歡賀昔孔篆吳札之墳秦存展季之壘事輕列國義小陪臣豈若天王禮士鳳書旌墓榮軼曩賢道映來籍在臣在子移孝爲忠心効草木何酬雨露無任幽明感戴之至謹奉表陳謝以聞

謝京城東亭子宴送表

臣某言力士至奉宣勅以臣臨岐特令賜宴恭承惠渥念及庸微天地同仁木石知感不勝惶悚戴荷之極臣中謝臣歷觀自古君臣凡所際會或因緣黨進或延接功成故未竭而知不言而信豈有地孤援寡毀衆謗深察蒙蔽之中致曠蕩之外逢陛下特達之遇當陛下聖明之朝事出非常澤深恩重今者誓將瀝血未足竭誠徒欲殺身豈能報德至如勵精勤政與直守公醉陛下憂人之心行陛下宏道之化安敢失墜以負神明但函關路遙長安日遠不任戀主淒愴之至

謝賜鍾馗及歷日表

臣某言中使至奉宣聖旨賜畫鍾馗一及新歷日一軸者猥降玉人俯臨私室榮鍾睿澤寵被恩輝臣中謝臣伏以星紀迴天陽和應律萬國仰惟新之慶九霄垂湛露之恩爰及下臣亦承殊賜屏祛羣厲續神像以無邪尤授人時殞歷日而敬授臣性惟愚懦才與職乖特蒙聖慈委以信任既負叨榮之責亦懷非據之憂積愧心顏難勝惕厲豈謂光迴蓬華念等勳賢慶賜之榮賤微常及感深大馬戴重邱山無任感荷之至

荊州謝上表

臣某言伏奉二月二十五日制書除臣荊州大都督府長史拜命荒服浮舟遄泝以今月十七日到州上訖山列楚望水橫南紀德非羊祜迹謝宋均何以鎮靜流亡攘除猛暴臣中謝臣宿濫宸眷累塵榮獎福

過生災至剛多缺及一辭庭闈已涉五年不有自白之書竟無因人之請天光獨照雲霧頓披窮麟更躍
鑛翮仍翥揣分瞻恩何階及此媿乏才能不足宣暢皇風敢竭心力少冀上醇元造無任欣忭兢惕之至
謹附送丁匠資使所部文林郎守公安縣主簿封希魯奉表陳謝以聞

謝問表元宗

臣說言內給事高力士至伏奉墨制聖慈綢繆言及舊昔拜舞捧讀且驚且喜臣聞漢主眷驥乘之臣魏
君憶同遊之客誠以故舊不棄而光陰易往今之聖情實過於昔臣曩蒙侍文北閣陪宴東堂庭闈一遙
寒暄二載不意逢春之草承清露之惠渥容光之隙引遲日之暉華無任荷恩戀主之至謹附高力士奉
表陳謝以聞

謝賜藥表

臣某言去年某月日於右銀臺門蒙天恩引對特承慰問攝理無方以致熱疾緣在假內不敢奏聞聖慈
憂憐詔使臨門伏枕在床雖體氣未適趨風拜命覺腠理遂平恩榮豈止於邱山朽質永延於龜鶴無任
感戴之至謹奉表陳謝以聞

岳州刺史謝上表

臣說言伏奉四月十有二日制書除臣岳州刺史某月二十七日遞書到相州承恩惶怖狼狽上道以月
一日至岳州上訖臣以昔侍金華過蒙榮寵負乘招寇日待譴黜聖慈遲迴仍委符守刻肌刻骨誠願上

報恩私無術無才將何克宣風化夙夜慚惕胡寧啓處伏以貶官到任理在速聞不敢循常稽緩附使無任荷恩兢懼之至謹遞表陳謝以聞

爲僧普潤辭公封表

僧普潤言伏奉甲寅制書以普潤加榮沐秩授邑封公聖恩無涯將變枯朽佛法有教誠願住持普潤自剃落壞衣五十餘載心不見是口不言俗因誠證業憑禪悟理幸逢皇祚特啓大運有歸皇太子逼畏凶讐永懷興復憂虞之際始蒙顧問貧道起廣救之悲決必成之策奉符命之旨贊無畏之心今得衆生平安羣魔消伏任於法侶所願爲多視身本無何功受祿天位有德陛下享之天討有罪太子行之豈貪天之功以爲已力賣佛之法而求身利必若冒榮背律返俗違真亦恐乖陛下崇信之誠失如來付屬之義凡所稱述諸佛證明伏惟聖慈亦垂開領乞停恩授以幸法門無任護戒傳道之至謹詣朝堂奉疏陳情以聞

張燕公集卷十一

疏

諫避暑三陽宮疏

陛下屯萬乘，幸離宮。暑退涼歸，未降還旨。愚臣固陋，恐非良策。請爲陛下陳其不可。三陽宮去洛城一百六十里，有伊水之隔，轔坂之峻，過夏涉秋，水潦方積，道壞山險，不通轉運。河廣無梁，咫尺千里，扈從兵馬，日費支給，連雨彌旬，卽難周濟。陛下太倉武庫並在都邑，紅粟利器，蘊若山邱，奈何去宗廟之上都。安山谷之僻處，是猶倒持劍戟，示人鏃柄。臣竊爲陛下不取。夫禍變之生，在人所忽，故曰：安樂必誠，無行所悔。此不可止之理一也。宮城褊小，萬方輻湊，填城溢郭，併鑄無所排斥。居人蓬宿草次，風雨暴至，不知庇托，孤惄老病，流轉衢巷。陛下作人父母，將若之何？此不可止之理二也。池亭奇巧，誘掖上心，削巒起觀，竭流漲海，俯貫地脉，仰出雲路。易山川之氣，奪農桑之土，延木石，運斧斤，山谷連聲，春夏不輟。勸陛下作此者，豈正人耶？詩云：人亦勞止，汔可小康。此不可止之理三也。御苑東西二十里，所出入往來雜人甚多，外無墻垣禁籞，內有榛叢谿谷，猛獸所伏，暴慝是憑。陛下往往輕行，警蹕不肅，歷蒙密乘，嶮巇卒然，有逸獸狂夫驚犯左右，豈不殆哉？雖萬全無疑，然人主之動，不宜易也。易曰：思患豫防。願陛下爲萬姓持重，此不可止之理四也。今國家北有外寇，覲邊南有夷獠，騷微關西，小旱耕稼是憂。安東近平，輸漕方始。臣願陛下

及時旋轉深居上京息人以展農修德以來遠罷不急之役省無用之費澄心澹懷惟憲萬年蒼蒼羣生莫不幸甚臣自度芻議十不一從何者沮盤遊之娛間林沚之玩規遠圖而替近適要後利而棄前歡未沃明主之心已戾貴臣之意然臣血誠密奏而不愛死者不願負陛下言責之職耳輕觸天威伏地待罪

凜激寒戲疏

臣聞韓宣適魯見周禮而嘆孔子會齊數倡優之罪列國如此況天朝乎今外蕃請和選使朝謁所望接以禮樂示以兵威雖曰戎夷不可輕易焉知無駒支之辯由余之賢哉且激寒胡未聞典故裸體跳足盛德何觀擇水投泥失容斯甚法殊魯禮藝比齊優恐非下羽柔遠之義樽俎折衝之禮

狀

論神兵軍大總管功狀

右牒奉勅責聞大總管功狀者自契丹背恩營州失守前軍喪律榆關不開幽平鳥栖於重塗戎羯虎食於四野燕南諸城十僅存一河朔之地人挾兩端由是豺狼入於牢窠蜂蠻出於懷袖受服不宿孤劖先驅寇讐日深甲兵未繼于時鳩合步騎不滿三千彼衆我寡兵怯虜熾日保關守塞力猶不禦況土人弄兵轉相攻拔外召夷狄內據險隘冀州既陷勢將不已當決水之衝承烈火之焰逆風撲燎摧岸塞河韓深籌秘于六奇潛檄通于千里滄瀛貝博響援增氣幽易恆定聲威有立而又分兵井陘杜其西望引軍

河漕阻此上流。張虛旗于趙城。設奇兵于襄國。亦猶夫吳人潛軍于巢縣。而見舟豫章。漢將捷逕于武關。而聲出崤澠。蓋廣援以安衆。多方以悞敵。故能舉無遺策。兵不踰時。滌昂宿于妖氛。拔冀方于塗炭。俾靈溥暢。黔首昭蘇。朝廷釋東顧之憂。漳滏息南侵之患。然後歸剽掠返流亡。業窮乏。賑痍傷僵暴皆掩死喪無怨。賞不失勞。亦無濫受。罰不漏罪。亦無冤人。則王有大勳于是役也。而又誠以奉上義以利人。至忠之狀有三。爲善之跡有五。所謂忠者。一曰思致命也。初戎寇方殷。王乘馴救衆。纔數騎。捍敵羣醜。山東父老如恃山河。既而王躬擐甲胄。吐誠師旅。誓在盡敵。以報前讎。故得感激來戰。決命爭勝。二曰能果斷也。囚黨狂狡。飛轉妖書。吠堯謗舜。間誘愚惑。事斯蔓結。搖我人心。王陰察州閭。揜求魁蠹。獲應賊書人耿羅灌等一十三人。焚書伏罪。衆而後定。故得破謀殺諜。悖計無施。三曰誠感神也。王地維近屬。躬當大任。所過山川鬼神之地。罔不精意懇禱。以請云天子聖明。皇天輔德。實降靈助。以濟神兵。幽感明祇。多獲孚祐。故得行師之處。勝風送旗。合戰之時。興雲翊陣。金鼓所向。冰消草靡。所謂善者。一曰均下也。飲食勞逸。與將士必同。二曰潔己也。徧賞有功。王秋毫無受。三曰詢善也。國之彝典。成誦在心。閱實定名。必資羣議。四曰嫉惡也。每戮一人。親數其罪。必深加咎責。使愧恥於地。五曰不伐也。賊平之日。將吏賀功。王稱美天威。推勞士衆。兢兢然若不已有也。惟聖人神武制命。預授兵符。惟大總管忠善龔行。克成廟算。今者顯號年紀。騰輝國籍。方謂垂範雲臺。勒休彝器。而杕杜遺宴。甫率于舊章。茅土增封。殊末于宗正。此壯夫義士。所以竊議而長歎者也。雖樹下不言。用歸功于明主。然策勳有典。何勸善于戎臣。敢憑下問。是用大陳。其所

正復州縣招撫歸降補署官僚存集流迸擒殺凶醜收獲軍實與吏士共功者俱如別狀。

賀彩雲見狀

右伏奉恩旨今日屬下元賜臣等侍從升降聖闕禮謁大聖尊容行香之際日西南有彩雲見者伏以大道無形至誠斯應上元降福感而遂通步輦陟於齋宮虔修香火彩雲生于曉日遽發祥光是知聖德與天心合符萬靈與羣仙叶贊臣叨陪侍從如昇汗漫之遊承恩禮謁更覩氤氳之瑞榮幸之極千載一時無任欣慶之至

賀破吐蕃狀

右臣等伏以涼州遙稟神算大振天威吐蕃小醜應時摧敗元惡渠魁乘勢俘戮隻輪匹馬坐見無遺雖虞舜之格有苗黃軒之征涿鹿未有廓清氛祲如今日之盛者臣等無任慶快之至

謝賜撰鄭國夫人碑羅絹狀

右內侍尹鳳祥宣口勅得所進鬪羊表及鄭國夫人碑今賜卿綵羅二十匹絹一千匹鬪羊薄技恩感戰士之心雕蟲陋詞媿稱賢母之德効輕賞重戴厚慚深臣子之情豈望天報

集賢院謝示道經狀

右臣伏見聖札金字八分寫道經兩卷以爲惠文太子三七追福天毫發彩宸翰騰輝色麗風雲光逾日月伏惟陛下孝弟之至通于神明俯念天倫用資幽贊當茲炎暑服此勤勞事絕古今感深名教臣忝司

舊職載考前王未有親親之至楷隸之美如此之備也足以作則貽範垂之無窮伏望宣付史館以光典策無任誠懇慚惶之至

謝賜御書大通禪師碑額狀

右內侍尹鳳祥宣示御書大通禪師碑額六字畫起平雲點蹲芒玉戈矛攢倚鸞鶴交飛神功發于至想睿思成于元德實謂天龍捧持虛空稱贊逝者如在薦福知歸臣栖志禪門撰碑靈塔幸遇聖情崇道御書假貸刻星辰于嘉石爛日月于封邱感極悲生恩深無答臣無任望外殊澤之至

謝賜藥狀

右內史陳忠盛宣旨賜臣痢藥臣攝生無方自貽疾疢聖慈矜憫垂恩救護氣衰力憊忽吞永命之符腸滑胃虛更餌返魂之草蒙天營祐指日痊平雖萬粉灰何酬造化謹附忠盛奉狀陳謝以聞

對策

詞標文苑科策

第一道

臣聞舜命昌言漢徵極諫嘗覽千古賢哉二君今陛下發德音下明制選空岩穴訪匝輿臺大哉邈乎過之遠矣臣以草莽之賤謬當車乘之招誠不足以庶幾王庭充塞大問伏讀聖旨乃知天心之所存焉臣聞昔者鳥跡代繩龍文演卦水土遷王時更萬祀金木互興人非一姓暨乎三皇五帝氏往夏商周漢氏

作或導人以禮樂或驅俗以政刑或革弊以忠敬或治風以文武非師古之諾有殊蓋隨時之義且異也伏惟聖母神皇陛下誕受鴻基光膺駿命粵若立極格天之業論道布政之典任賢克暴之功出洛卿雲之瑞此并藏緯玉冊勒休金版鬱美前古揚光後葉者矣至若創業垂統之則宏猷永圖之美重光三聖再清六合可不謂然乎猶或惕慮推溝勞謙馭朽謝文明于薄德想疇庸于清問此陛下之至讓也愚臣何足以知之策曰適時之務何先經國之圖何最臣聞古者因人以立法乘時以設教以義制事以禮制心夫人者理得則氣和業安則心固崇讓則不競知恥則遠刑若強人之所不能雖令不勸禁人之所必犯雖罰且違故曰政不欲煩煩則數改數改無定人懷苟免之心網不欲密密則深文深文多傷下有非辜之懼竊見今之俗吏或匪正人以刻爲明以苛爲察以剝下爲利以附上爲誠綜覈之司考課專于刀筆撫字之宰職務具爲簿書陛下日昃雖勤守宰風化多闕臣以爲將行美政必先擇人失政謂之虐人失人謂之傷政捨人爲政雖勤何爲伏願陛下進經術之士退掊克之臣崇簡易之化流愷悌之風畫一成歌此適時之務也慎賢而用此經國之圖也苟能英才不棄大化方隆而猶曰朝謝垂衣野非擊壤則文武之道尙何言哉堯舜之君徒虛語耳策曰帝皇之道奚是王霸之理奚非者布在方策臣聞之矣聖人御歷上淳而下信帝者應期君明而臣哲周用王道教化一而人從漢雜霸政刑政嚴而俗僞故親譽優于畏侮文章劣于成康臣謹對

臣聞刑以助教德以閑邪先王慎于好生大易誠于緩死今陛下每臨黔首子育蒼生佑下人克配上帝然有東南小祲荆蠻遠郊雖聖德泣辜尚用防風之戮天心罪已仍勞淮甸之征其有詿誤閭閻脅從井邑陛下愍孤霜于海淮恤困窮于江漢捨從寬宥此陛下之恩也而蕞爾餘孽蠢茲頑兇思弄兵于潢池之下將構難于戎狄之城罪盈稔貫禍得萌芽此又陛下之明也今陛下乃賜臣策曰豈止殺之方乖于折衷將小慈之澤爽彼大猷臣實見折衷大猷之規不知小乖微爽之義也策曰刑政之要實所明閑臣聞政猶水火刑譬陰陽頃者三監亂常有司既糾之以猛于今四罪咸服陛下宜濟之以寬明肆赦之渥恩安萬人之反側布深仁于羅鳥收至察于泉魚豈不大哉天下幸甚且夫人者毗也暗而不可罔庶者衆也愚而不可欺是故刑在必澄不在必慘政在必信不在必苛故明王之理天下也刑一則人畏而不干政簡則俗齊而不僞於是禍亂不作災害不生君安于上臣悅于下百姓日用而不知其然四海風動惟帝之則道暢鍾石聲流舞詠其行己也非他所理者以此刑政之要庶幾一隅臣謹對

第三道

伏惟陛下則天法地畏命重人據河洛之規模總風雨之交會軒后魚圖之水建邦設都周公龜墨之地考堂作室靈祇降福嘉祥薦祉制同神造力以子來將以殷薦上帝至法也嚴配先王至孝也加以八風攸序四時克諧無得而稱能事畢矣猶復執勞謙之不已懼盛禮之未宏訪末學之臣詢稽古之政斯事體大臣何足言然而敢不欽承以竭涓滴耶策曰何代之政參詳適中何禮之規施用爲切臣謹錯綜三

五明徵典謨竊以緯武經文布方策而非遠英風顯號流頌聲而可襲未有反義悖德而致昇平之政棄禮達經克以永終之祿莫不發號施令法乾坤之動靜執契縣衡順金木之刑政是故青陽元室遵孟仲而觀風白輅朱旂因離光而布政養老用上庠之禮教胄取大學之義環水著辟雍之名向陽表明堂之位蓋所以享羣瑞朝諸侯頒正朔調景緯成簡易之基崇久大之業也皇王奧旨庶此詳探周漢前蹤難于專用臣才智駑劣草莽鰥生至如軍國務廣政刑理急但至敬無文信言不美陛下欲聽其說必觀于事將達其謀先求諸道危言抵禁破膽寒心伏惟聖主稍留天聽臣謹對

批答

答宰臣賀破賊狀

省表具知蠢茲戎狄侵軼邊鄙不交鋒刃自取敗亡既邊將之功亦天道所棄心之有慰與卿同之。

張燕公集卷十二

序

大衍歷序

特進集賢院學士修國史上柱國燕國公臣說言。歷者先王以明時授人敬天育物者也。辰極恆居斗運不息晦朔相推而變月寒暑往來而成歲日月右轉周天之度啓星辰左旋正時之氣合積餘分而置閏配甲子而設蔀鳳鳥爲司疇人受職分分而加之者百鈞必過毫毫而減之者千里必差何則古法存而其人異也不有大聖孰能起之伏惟開元神武皇帝陛下欽崇天道慎徵月令受命再新改制創歷十有三祀詔沙門一行上本軒頃夏殷周魯五王一侯之遺式下集太初至於麟德二十三家之衆義比其異同課其疎密或前疑而後定或始會而終乖振古未探之象必發揮於神算大鈞不測之氣盡醜縷于天聰迺更審晷度之短長覈星間之廣狹繩九道之朓朒糾五精之進退參大衍天地之數綜八卦六爻之序一轍於文王也覈春秋交蝕之辰研九疇五紀之奧同文於孔子也杼軸萬象優柔四載奏章朝竟一公夕落臣說奉詔金門成書冊府先有理歷陳景善算起昇首尾參元之言接承轉籌之意因而會輯編次勒成一部名曰開元大衍歷經七章一卷長歷三卷歷議十卷立成法十二卷天竺九執歷一卷古今歷書二十四卷略例奏章一卷凡五十二卷所以貫三才周萬物窮數術先鬼神稱著曰者卽聖人顧訪

之旨標謹按者是歷家進對之辭非軒后至聖不啓履端之業非容成詣極不就歸餘之經據其圖也七政之天心不遠守其術也千歲之日月可知蓋中黃之寶符太紫之神器者也謹以十六年五月端午赤光照室之夜皇雄成紀之辰當一元之出符獻萬壽之新歷伏望藏之書殿錄於紀言掌之太史頒於司歷制曰可

唐昭容上官氏文集序

臣聞七聲無主律呂綜其和五采無章黼黻交其麗是知氣有壹鬱非巧辭莫之通形有萬變非工文莫之寫先王以是經天地究人神闡寂寞鑑幽昧文之辭義大矣哉上官昭容者故中書侍郎儀之孫也明淑挺生才華絕代敏識聰聽探微鏡理開卷海納宛若前聞搖筆雲飛咸同夙構初沛國夫人之方娠也夢巨人俾之大秤曰以是秤量天下及昭容旣生彌月夫人弄之曰秤量天下豈在乎子孩遂啞啞應之曰是生而能言蓋爲靈也越在襁褓入于掖庭天實啓之故毀家而資國運將興也故成德而受任自則天久視之後中宗景龍之際十數年間六合清謐內峻圖書之府外闢修文之館搜英獵俊野無遺才右職以精學爲先大臣以無文爲恥每豫游宮觀行幸河山白雲起而帝歌翠華飛而臣賦雅頌之盛與三代同風豈惟聖后之好文亦云奧主之協贊者也古者有女史記功書過復有女尚書決事宮閣昭容兩朝專美一日萬幾顧問不遺應接如響雖漢稱班媛晉舉左嬪文章之道不殊輔佐之功則異迹祕九天之上身沒重泉之下嘉猷令範代罕得聞庶姪後學嗚呼何仰然而大君據四海之圖懸百靈之命喜則

九圍挾纊怒則千里流血靜則黔黎乂安動則蒼毗罿弊入耳之語諒其難乎貴而勢大者疑賤而禮絕者隔近而言輕者忽遠而意忠者忤惟窮窪柔曼誘掖善心忘味九德之衢傾情大藝之圃故登崑巡海之意寢翦胡刈越之威息璿臺珍服之態消從禽嗜酒之端廢獨使溫柔之教漸於生人風雅之聲流於末葉非夫元黃毓粹貞明助思衆妙扶識羣靈挾志誕異人之寶授興王之瑞其孰能臻斯懿乎鎮國太平公主道高帝妹才重天人昔嘗共遊東辟同宴北渚倏來忽往物在人亡憫雕琯之殘言悲素扇之空箇上聞天子求椒掖之故事有命史臣敍蘭臺之新集凡若干卷列之如左

孔補闕集序

唐會稽孔季翊字季和識真之士也弱冠制舉授校書郎轉國子主簿年三十一卒於左補闕祖紹安中書舍人考楨絳州刺史季和清規素業有奕代之訓依仁游藝其聖者之後永昌之始接跡書坊有廣漢陳子昂鉅鹿魏知古高陽許望信都杜澄昌樂谷倚廣陵馬懷素東萊王無競河南元希聲臨淄李伯魚譙國桓彥範僉謂季和神清韻遠析理探微衛叔寶之比也嗚呼人斯云亡世閱多故十年之外零落將盡而後來者皆首華金步鳴玉負璽丹地揮毫紫宸何嘗於拜職之日歎在劉王喬臨壇之時恨無謝益壽者矣頃見許渺之子風裁可觀潘子之門有尼夏侯之學傳建集作者五卷以示予稱從弟四人皆良器愴相如之遺草幸公業之不亡因敍曩意存之篇首云爾

洛州張司馬集序

夫言者志之所之。文者物之相雜。然則心不可蘊。故發揮以形容。辭不可陋。故錯綜以潤色。萬象鼓舞。入有名之地。五音繁雜。出無聲之境。非窮神體妙。孰能與乎。湖州司馬張公。名希元。中山人也。族高辰象。氣壯河山。神作銅鉤。天開金印。孝友內植。禮樂外滋。勵行閨庭。鄉人謂之曾子。飛名都邑。諸儒號曰聖童。下帷覃思。穿牆嗜古。蓬山芸觀之書。羣玉懸金之記。魯宮藏篆。汲冢遺編。無不日覽萬言。暗藏三篋。博學吞九流之要處。盈若虛。雄辯敵四海之鋒。退藏於密。漢王問策。知帝者之師。楚子聞名。實諸侯之選。故得雄飛白簡。鷹揚丹筆。卷襜帷於天郡。設鉤距於皇都。若乃抗埋輪之章。執驚馬之議。旌賢有通德之教。疾惡存署背之文。繼軌前途。遇物成興理。關刑政。咸歸故事之臺。義涉箴規。盡入名臣之奏。加以許與氣類。交遊豪傑。仕遘夷險。身更否泰。昔嘗攝戎幽易。謫居邛崐。亭臯漫漫。興去國之悲。旗鼓洶洶。助從軍之樂。時復江鶯遷谷。隴雁出雲。夢上京之臺沼。想故山之風月。發言而宮商應。搖筆而綺繡飛。逸勢孤標。奇情新拔。靈仙變化。星漢昭回。感激精微。混韶武於金奏。天然壯麗。絳雲霞於玉樓。當代名流。翕然宗尚。自大夫之頌成室。太史之賦京都。魏則十龍儒雅。晉則三陽藻綴。朝分南北。連迄周隋。文人才子。重世間出。豈止柟櫧體物。陳琳得以示人。鵩鶲寄辭。阮籍稱其王佐。故以開國籍。鱗次乎史傳之首。入文場。羽儀乎天下之半。公增繁榮業。桂林之一枝。彌廣源流。荆江之九派。宗門多士。斯爲盛歟。且如承家舊德之某。賓王歷官之序。玉琯銅渾之數。黃公元女之符。落猿殮咒之巧。飲鵠迴鸞之妙。詳諸列傳。可略言焉。某室邇蘭芬。族聯棣萼。荷千里之嘉獎。接四友之良遊。謹撰令引式題前集。七子賦詩期取類於鄭志。一家垂範庶齊。

衡于孔叢來日新文請俟君子起儀鳳之後迄景龍以前凡若干卷列之於

季春下旬詔宴薛王山池序

有生之性萬殊無方之感一節陽和而動植暢春滿而臯壤悅后皇所以發時令布新慶二南邁周召之風百辟留金石之詠者也碧流日暖南山雪殘首獻歲之浹辰尾暮春之提日帝京形勝借上林而入遊戚里池臺就修竹而開宴泉賙玉府味給天厨仙倡宥樂中貴督酒太平佳事前史未書大矣哉一德日新九功惟敍運璇樞而均四氣握金鏡而靜萬方堯舜湯文不違顏於咫尺夔龍伊呂共接手於朝廷不可見而見焉不可聞而聞焉豈深思勝殘去殺累百年之至仁推歷按圖啓千齡之昌運河清難得人代幾何擊壤之歡良有以也此則青門上路朱邸平臺城煙屢起而泊山野風時來而過水春將悵別愛落花之灑途夏如欣會玩峯雲之映沼爾其列筵授几分曹設幕艇送江兒船迎海鶴魚龍丸劍曼延揮霍鸞鳳簫鼓朋鳴輩作巾錫開於百甕慈心出於三爵炮炙薰林塘醪醴厭邱壑抃急管於無算醉湛恩以取樂羣公賦詩俾僕題序長卿消渴覺含毫之轉遲子雲壯夫見雕蟲之都廢敢憚鄙詞之訥澀恐貽盛集之蕪穢云爾

先天酺宴序

先天元祀孟冬十月東都留守韋公寅奉聖朝述宣嘉旨乃合洛京之五省招河伊之二縣將吏咸集佩章有序鏘鏘濟濟侃侃闇闇供張於興教之門式酺宴也原夫樂生於心非因清風之奏和達於氣無待

陽春之節蓋澤之所及也深則情之所感者遠國家天地一統君臣百年朝榮舊德之緒野服先疇之業元化漸漬洪恩既久太上功德不宰夏后命子之初皇帝孝理無爲漢祖事親之日生堯舜于天屬見文武之同時前古未逢斯人何幸是日六樂振作萬舞苒弱鳥獸徘徊士女踴躍則知衆庶觀聽之所樂也旨酒絡繹大庖燔炙芳溢風煙醉流阡陌則知衣冠酣暢之所適也由近而視遠萬國之慶皆然自明而察幽三靈之歡可接若夫吟咏德澤播越仁聲斯固雅頌之餘風政教之遺美凡我詞客安敢闕如賦詩展事垂列於後

南省就竇尚書山亭尋花柳宴序

尋花柳者上賜羣臣之宴也大哉春氣同夫聖心無物不榮有情咸達況乃五教敷洽萬邦懷和尉候警而莫犯刑法存而不用歷觀近古此遇良難諸公入金門侍瑤殿窈窕雲閣歲蕤華館不亦泰乎然王事靡鹽夙夜在公接良會於愷澤散煩襟於清曠不亦優乎爾其嘉賓爰集勝賞斯備召絲竹於伶官借池亭於貴里雕俎在席金羈駐門遠山片雲隔層城而助興繁鶯芳樹遶高臺而共樂旨酒未缺方塘半陰盍陳旣醉之詩以永太平之日

鄴公園池餞韋侍郎神都留守序

夫良才出乎休運大任歸乎令德四海既安乃注意於賢相兩部分正實具瞻于師尹鸞臺侍郎兼左庶子韋公國之楨幹人之表儀矜嚴有叔子之容持重得楊公之望門通禁省當朝稱累代之名管綜諸閫

帖職盡一時之美頃以五星東聚八月西巡武王旣入於鎬京君陳當往於洛邑中日晷之盈縮均天宇之會同清廟明堂政理之本也太倉武庫兵食之原也機務所總半天下之軍國聽訟實繁連海隅之郡縣恩有密而處遠事有疎而授親腹心遐寄惟賢是屬歲臨單閼月在長嬴同簷何之居守當陰識之留鎮北闕拜辭西堂宴餞大君垂藻承月露之光榮元良賜服被星海之耀潤執事以同列之好載壺酒而送行鄴公以彌甥之禮掃郊園而留別此地有離洲別嶼竹館荷亭曲沼環合而連注叢山相望而間起幽隱長寂蕭條遠風通終南之雲氣下昆明之水鳥爾其駐馬青林肆筵碧岸清管四發坐客增悲高臺一望游人忘返韋公方祇率嘉命保釐成周樹之風聲流我王澤然而臨觴不樂首路遲遲瑣闌夕拜戀未央之宮闕錦服晝遊懷杜林之桑梓層城日下高蓋雲飛天子賦詩已載寵行之輿羣公盛集須傳出宿之文凡若干首合成一卷陸生何幸暫游朝宰之間商也斐然經述國風之序云爾

送工部尙書弟赴定州詩序

宵旰天子送冬卿之詩也河朔愆歲恆陽俟牧借威六官導俗千里俾乎列城遷仰上之化鄰境蒙波及之澤不然者豈一小郡而勞大賢哉尙書河東侯朝廷之舊宰也操法度于掌握運陶鈞于方寸是將敷皇惠寒谷挾纊而知暄暢君恩疲人飲德而自飽蘇其槁瘁樂我陽和元宗殿國亦望于此于時春帶餘寒野銜殘雪太官重味御酒百壺供帳臨岐假絲竹以留宴傾城出餞會文章以寵行三台厚常寮之意八座深聯事之矚旣而離人遽起班馬爭嘶尋太行之連山想邯鄲之長陌雖仰瞻鴻鴈來往易於前期

而相對桑榆。遲暮難于遠別。送歸之地。歡悽如何。應制華篇。凡若干首。騫翔鸞鳳。欲挂千金之木。糾合蛟龍。附藏羣玉之府。置之懷袖。以慰遐心云爾。

送毛明府詩序

昔之謂良宰者。講道議行。訓俗式人。出自郎官。遷登郡守。不以才限流品。位遷寵賂。聖歷之際。任賢稽古。毛明府執德不回。發言無擇。雍容文雅。罷曲江之曳裾。樽酒絃歌。卽羊卿之製錦。甲朝辭洛宴。別嘉賓。孟夏涉河路。踐芳草。眷彼燕趙。頃罹戎寇。金革毒三北之師。杼軸醜二東之賦。毛公將勝苛居簡。止濁徐清。不下堂而爲理。有入境而先歎。朋知坐間。弦望何時。益賦金谷之詩。遠送邯鄲之陌。愛而不見。同夫樹萱。

會諸友詩序

谷子者。昔與說聯務蓬山。出入三載。事志相得。情深友于。尋屬吾人秩遷。迫吏畿劇。愛而不見。春也再華。今說復謝書坊。補他職。窮猿之意。不擇儒林。喜且把袂舊筵。解帶餘日。臥玩文墨。笑談平生。茲歡豈多。後面方永。沉沉春雨。人亦淹留。

張燕公集卷十三

啟

上東宮請講學啓

臣某等啓。臣聞安國家定社稷者武功也。經天地緯禮俗者文教也。社稷定矣。固寧輯於人和。禮俗興焉。在刊正於儒範。順考古道。率由舊章。故周文王之爲太子也。崇禮不倦。魏文帝之在青宮也。好古無怠。博覽史籍。激揚令聞。取高前代。垂名不朽。伏惟皇太子殿下。英睿天縱。聖敬日躋。神算密發。雄威立斷。廓清氣祲。用寧家國。兆人由是歸德。六合所以推功。主鬯青宮。固本也。分務紫極。觀政也。副羣生之望。作累聖之儲。殿下之於天下。可謂不輕矣。監國理人。可謂至重矣。莫不拭目而視。清耳而聽。冀聞異政。以裨聖道。臣愚伏願崇太學。簡明師重道。尊儒以養天下之士。今禮經殘缺。學校陵遲。歷代經史。率多紕繆。實殿下闡揚之日。刊定之秋。伏願博採文士。精求碩學。表正九經。刊考三史。則聖賢遺範。粲然可觀。況殿下至性神聰。留情國體。幸以問安之暇。應務之餘。引進文儒。詳觀文典。商略前載。討論得失。降溫顏。開讌議。則政途理體。日以增益。繼業承祧。永垂德美。臣等行業素輕。藝能寡薄。顧慚端士。叨侍宮闈。日夜祇懼。無以匡輔。區區微誠。願効塵露。輕進芻鄙。庶垂採擇。臨啓如失。伏用兢惶謹啓。

書

與執政書

說拙於守身.往年遷流嶺外.亡親愁懼.痼疾增加.比蒙生還.曾未數歲.家口在洛.身徒入京.及丁凶苦.不獲侍側.比於他人.情實不等.在禮.君親同貫.事君無負.事親有負.不能殺身.以自咎責.乞過祥禱.報國非遲.三度表請.不蒙矜遂.當是文墨不盡苦心.投之執事.乞爲一言聞達.不敢守禮抗請.直是私情乞恩.若以此情可矜.猶冀聖人萬一哀憫.若將遺越.甘心待罪.謹狀.

與鄭駢馬書

晚尋莊周書.以天地爲國.道德爲身.老室之戶牖.孔門之根闡.足可反覆孝慈.胎育仁義.而晉朝賢士.乃相尚浮虛.弛廢禮樂.其所遺失.將詣真宗不愈遠也.老稱歸根曰靜.復命知常.復命近于無.有知常其有知見耶.斯故反照爾.孔云窮神知化.德之盛者.神不可窮而窮之.是神合于我.化不可知而知之.是化爲我用.唯此二義.繫莊生亦未始盡言焉.非榮陽之深于道者.孰爲輕導茲意也.

露布

爲河內郡王武懿宗平冀州賊契丹等露布

大總管右金吾衛大將軍兼檢校洛州長史河內郡王臣某.前軍總管行左衛翊府中郎將上柱國定陽郡開國公臣楊元基.行軍長史朝奉大夫守給事中護軍臣唐奉一行軍司馬通議大夫行六官郎中鄭果等言.臣聞氛祲薄霄.戎狄謀夏.則武庫兵動.中國有弧矢之威.文昌將飛.邊城用金革之事.蓋以式遏

姦暴大庇黎人震蠻蕩夷明罰耀武者也伏惟天冊金輪聖神皇帝陛下仁覆有截化被無外皇圖未臣之黨帝載不庭之俗罔不衣被聲教浸潤邕熙望雲向風密邇遐裔而契丹兜醜奴隸餘苗非冒頓之雄族異單于之貴種徒以錯居遠郡漸化平時田牧混乎四甿貿遷通于三市戍人解里邊馬垂轡禽獸飽而忘恩蜂蠭養而恣毒敢孤亭育自絕生成乃狠心干紀鴟張竊發虐我邊吏覆我鎮軍大棘殘于夷落孤竹淪于荒虛陛下震赫斯之怒授決勝之符天地合謀鬼神助順六狄舉國百蠻整衆運捲捨而掃除從列缺而焚蕩臣飲冰受斧指日揚麾雖謝河間之學竊慕任城之勇誓將首冒鋒力躬先士卒上假神兵之威下定鬼方之罪凶醜狂悖素無大志因乘便利扇動姦回去歲嘗師疑一軍之盡化今春輕敵見三帥之不歸蟻聚實繁豺牙益厲結山戎以西寇連島夷而東入臣乃廣開形勢大振聲威移告郡邑金湯固守傳檄諸軍掎角相應清邊道大總管建安郡王攸宜杖鉞薊門作鎮燕國當要害之地挫虎狼之羣高壘深溝臥舊營而不動山蛇雲鳥陣死地而無疑總管沙叱忠義王伯禮安道買等兵臨易水使接桑河犀渠衝將士之冠雕騎落將軍之戰四面當敵九拒乘城御史大夫婁德總管高再牟薛思行扞敵中山折衝外侮訓厲鷹揚之士輯睦震驚之師其餘部散棧分離綱別緒兵車星布巡大行而綴碣石介馬雲羅挾衡漳而連海浦山川積雨盡消邊騎之塵草木長風咸有王師之氣清邊士馬稍南驅而擁甲彌于千里長驅松漠掩集柳城巢穴是空胎卵皆覆于時賊衆兵馬屯逼幽州聞其塞外之敗懼有舟

中之敵勢力外窘心腹內乖建安郡王攸宜蓄銳淵停乘機電發援桴作氣則山岳動搖書箭一飛則酋渠相滅兵纔接刃元兇授首春喉蔽野京觀起于中州積甲成山組練收于外府雖本根斯拔已蕩滌于一隅而餘蔓所滋尙聯延于數郡賊帥何阿小等頑凶是極奢儉爲資授其署置肆行驅掠幽陵之下不知首惡之已擒兩河之間仍謂游魂之可恃士女遭其遑脅軍城被其屠陷以殺戮爲事戶積虔劉之悲以劫奪爲心家盈剝割之痛鹿城縣令李懷璧衣冠貴胄令長崇班背我朝恩歸城狄寇潛修甲杖輸以利器之資見委兵權當其上將之任蠢茲狂亂暫同燎火言事剪除方申沃雪臣乃盛兵邢趙塞井陘之隘命虎賁之將遏其衝突之鋒長史唐奉一馳使洛魏據阿曹之津縱羽林之雄挫其侵軼之勢臣又遣將軍總管忠武將軍行左衛翊府中郎將上柱國定陽郡開國公楊元基押飛騎營中郎將李鐸子總管雲麾將軍行玉鈴衛翊府中郎將康國公阿史那毗伽子總管冠軍大將軍行左玉鈴衛翊府中郎將宋撥延子總管冠軍大將軍行左金吾衛翊府郎將回鶻果別勅行人雲麾將軍康戡誕子總管定遠將軍左威衛長李當義壯武將軍何義本子總管忠武將軍何利深子總管壯武將軍俱羅擢淮宣威將軍行左玉鈴衛翊府郎將蘇達侯斤度施子總管定王府典軍成善威子總管押飛騎定遠將軍平原府左果毅長上穆仙童子總管劉尚珪子總管渭川府左果毅鹿思讓押飛騎左玉鈴衛隊正長上賈楚珪左鷹揚衛長上花匡鼎押飛騎李言忠押飛騎沮忠揚鎮副張元孜押飛騎康景休押飛騎左監門衛司戈竇九臯別奏右武威衛長上楊仁爽左武威衛長上楊裔原州崇岡鎮副康戎子右監門衛長上傅阿毛左

監門衛長史殷承範右衛長上王仁獎右衛執戟嚴宏琰右金吾衛羅元讓潭州花石戍上蘇元暉前右武威衛長鄭嘉祥左衛司弋鄭彥湊媯州威寧戍主崔思疎押步兵子總管左玉鈴衛長上張中儼別奏首領蘇農婆羅三品子首領宋義本別奏游擊將軍左玉鈴衛宿衛哥咄施注比別奏鄭思疾左衛潞州府果毅員外置同正阿史皎子總管王城府檢校果毅任宏誓別奏檢校虞候任處寂別奏裴光嗣等徇其東北又遣子總管游擊將軍玉鈴左司階伏羌縣開國男李宏顏子總管邢州司戶參軍飛鳥縣開國男常元楷子總管原州廣牧領將軍元寂子總管右武衛員外置同正武元禮子總管前潞州參軍武其別勅行人張景扶州刺史舊鎮副崔敬一右武衛中郎將阿史德奉職右鷹威衛將軍業溫啜刺俟斤右豹韜衛柔遠府長史上果毅吐火羅決斯右金吾衛果毅執失守直右鷹揚郎將員外置同正阿所那左玉鈴衛長上借緋金元濟東天竺國王子僧伽杖摩右鷹揚衛郎將僕固郡骨支左金吾衛郎將阿康地貝右武威衛郎將東河察使左豹韜衛高城府長上果毅阿史德伏摩支右玉鈴衛郎將路驢騎左金吾衛長上阿史德伏摩支右玉鈴衛郎將路欲谷游擊將軍葛羅枝延游擊將軍契苾木昆折衝都尉車鼻施俟斤虔州猶口鎮副白善德晉州仁壽府果毅侯義威子總管左武威衛候神城府果毅杜元隱押後騎隊楊待封前冀州堂陽縣丞溫待禮別勅行人白君晉等略其西南或折衝其前或乘蹕其後整貔貅之佐奮猛毅之倫長戟林廻高旗雲撓賊黨窮漏急命卒途殲執無全之心投必死之計以今月一日

何阿小等帥不悛之旅擁脅從之衆結聚數萬抗拒官軍自寅及午前後九陣元基等並鋒鏑爭先戈鋌遞躍抗足而趾鮮卑之血塗地攘臂而扔烏丸之首積野摧同冰陷裂若山焚窮其子遺無復噍類斬獲逆賊冀州三品大總管何阿小逆賊河北道招慰大使冀州刺史馬行慰逆賊冀州道副大總管楊奉節逆賊冀州長史王宏允逆賊總管劉伏念逆賊十二衛大將軍見任鹿城縣令李懷璧逆賊信都縣令楊志寂總管胡六郎逆賊總管王知先逆賊帥馬明誓逆賊三品總管姬目等魁首巨蠹三百餘人所有戎馬憑陵殘毀之處臣皆宣布制旨撫集其人咸懷聖恩俱得復業羣凶既定冀方砥平二載逋誅一朝泯滅數州愁毒俄然清弭舞溢河冀歌達塞垣截風浪以息滄溟廓氛埃而覩白日郤穀何力敢推羣帥之勞叔向有言實在明君之德臣憑藉睿略忝當戎政神機密運不待橫草之功天贊冥符恭承破竹之勢伏惟廟勝速奉朝歡抃舞之情倍萬恆品不勝慶快之至謹遣僕大夫官常選李佑別奏左衛長上校尉張德俊奉露布以聞其軍資器械別簿條上謹言

張燕公集卷十四

碑銘

后土神祠碑銘

至哉坤元萬物資生王者母事德合天明義有大報用協永貞茫茫九土思索其精因天事天因地事地彼汾之曲高睢傑異景象遺光壇場舊位寂寥千祀精靈永悶諱神不祥復古維祺文所無者秩而祭之矧曰后土昔載明祠何必因陰乃爲我師意多漢武跡在橫汾風流可接簫鼓如聞壽宮創制神鼎勤勸古往今來豈無斯文

西嶽太華山碑銘

嶧嶧太華柱天直上青崖白谷仰見靈掌雄峯峻削菡萏森爽是曰靈炎衆山之長白帝西下黃河北來陰陽孕育精氣徘徊偶聖呈瑞逢昏降災玉池神挹石室仙開海絕瀛洲天遙元圃偉哉此鎮錚鑠西土鬼神年遊風雲忽聚高標燁日半壁飛雨自古王者巡方必至龍駕帝服封天禪地南面會神西后在位待予治國安人然後徐思其事

唐陳州龍興寺碑

觀夫廣大無相者空虛也四輪倚之而住對微無體者佛性也萬法因之以生聖人有以見三界成壞皆

有爲穀故剖之以戒齋聖人有以見六趣輪迴是無明網故決之以定力燦寶光之慧炬而沛善利之慈舟返迷路率於中道猶橫流登於彼岸以言乎真實之要總攝一乘以言乎天地之間曲成萬物大矣哉道心包舉等太虛而無際法教流通彌曠刼而常在則有乘如來方便出應化門用大士因緣處帝王位俾庶類咸若謂之光宅天下令衆生修善名爲莊嚴佛國龍興寺者皇帝卽位之歲溥天之所置也唐祚中微周德更盛歷載十六姦臣擅命伯明氏有盜國之心一闡提有害聖之迹皇上操北斗起東朝排闥闔運扶搖張目而叱之殷乎若震雷發地歛號翕響以克彼二凶赫然若太陽昇天暉照仰象以復我萬邦返元后傳國之璽受光武登壇之玉尊祖繼宗郊天祀地之禮旣泊修舊布新改物班瑞之典又備乃考出世之法鼓大雄之事入無功用之品住不思議之方一光所燭庶兆爲之清涼一音所宣大千爲之震動雲蒸風靡不崇朝而壞之踴塔徧天下矣陳州者上古太皞之墟近代睢陽之地置守則列爲郡封王則建爲國本其風俗豪侈靡麗舊矣翻東門之下接袂成帷觴宛邱之上炫服成市信豫章之郊一都會也刺史南陽韓府君名琦其爲邦也勝殘去殺聖主之得賢臣別駕彭城郡王名隆業其從政也能肅而恭高陽之有才子長史南陽張齊賢儒林之選也司馬河南雲盈公族之良也士曹從事八人錄事參軍千璆爲稱首六屬官人二十五人宛邱縣令崔修己爲稱首或以藝榮或以門進高車一轍美利同人禮舉刑清於是乎在因邦甸積稔之蓄偶日月正旦之初欽若王言建立靈寺上略其趾下務其終百工不勸而亟庶役不徵而會經始如雲成之不日夫其帶四郭五衢之陌踞重墉闢闔之端福地砥平長垣

雲巒高門有闕大廈斯飛連廊曲閣交軒對露木磨而不雕土塗而不飾壯無僭侈以約費爲工儉無幅陋以淨居爲寶法王宮殿近寶花之城菩薩伽藍住金燈之地亦猶是也上座處元寺主真度維船守慎繞于時陳項之老褒衣而博帶皤皤然相造而諏曰久矣吾黨之惑也倥侗顓蒙情實橫放悉愛我業聰明不開日有忘其生生月無覺其滅滅一息之漏可勝言哉而今舉足至于道場申臂及于淨土晝則目禪誦之事夜則耳鐘梵之音何悟是生晚臻斯樂豈不思天子之至仁乎惻下人之昏墊遙上聖之昭軌假有相之途詣無生之理灑冥澤於已滅蒂元根於未始百靈之所歸依萬宇之所欣喜非獨陳而已矣蓋神闢天聖開地世之祖也纂帝寶基皇統孝之主也殄謫狂破魔孽威無外也廣正典紹度門德無大也通幽洞明兼麤該精滂洋而行混濩厥成一收功而四善舉一推心而羣願立咨如是則龍興之化曷有量哉夫業可大而蕪沒焉不貽於後事可尊而苞蘊焉不述於世臣子之罪也敢請圖之然言語之不到者心識心識之不到者真如二乘聞之而不見十地見之而未了而我云何能知能說竊比六時之鳥七寶之樹是出乎和雅音聲是讚乎微妙功德記其在處長者之金園銘其事因育王之石柱其詞曰聖皇在上於昭于天唐雖舊邦其命維新龍興返政滅二暴臣少康非儻于舜爲鄰皇王烝哉於廓元教生人戶牖神化洒心小大稽首掌擎萬域潛移仁壽三代之前蓋未會有最上乘哉渙渙陳服韓侯道之奕奕寶坊邦人造之天龍護持賢聖熙熙受福維祺帝心則怡正理興哉

唐玉泉寺大通禪師碑

譏夫總四大者成乎身矣立萬法者主乎心矣身是虛哉卽身見空始同妙用心非實也觀心若幻乃等真如名數入焉妙本乖言說出焉真宗隱故如來有意傳要道力持至德萬劫而遙付法印一念而頓授佛身誰其宏之實大通禪師其人也禪師尊稱大通諱神秀本姓李陳留尉氏人也心洞丸漏懸解先覺身長八尺秀眉大耳應王伯之象合聖賢之度少爲諸生遊問江表老莊元旨書易大義三乘經論四分律義說通訓詁音參吳晉爛乎如鑿孔翠玲然如振金玉旣而獨鑒潛發多聞旁施逮知天命之年自拔人間之世企聞蘄州有忍禪師禪門之法嗣也自菩提達摩天竺東來以法傳惠可惠可傳僧璨僧璨傳道信道信傳宏忍繼明重跡相承五光乃不遠遐阻翻飛謁虛受與沃心懸會高悟與真乘同徹盡捐忘識湛見本心住寂滅境行無是處有師而成卽燃燈佛所無依而說是空王法門服勤六年不捨晝夜大師歎曰東山之法盡在秀矣命之洗足引之並坐於是涕辭而去退藏於密儀鳳中始隸玉泉名在僧錄寺東七里地坦山雄目之曰此正楞伽孤峯度門蘭若蔭松藉草吾將老焉雲從龍風從虎大道出賢人覩岐陽之地就去成都華陰之山學來如市未云多也後進得以拂三有超四禪昇堂七十味道三千不是過也爾其開法大略則專念以息想極力以攝心其人也品均凡聖其到也行無前後趣定之前萬緣盡閉發慧之後一切皆如特奉楞伽遞爲心要過此以往未之或知久視年中禪師春秋高矣詔請而來趺坐覲君肩輿上殿屈萬乘而稽首洒九重而宴居傳聖道者不北面有盛德者無臣禮遂推爲兩京

法主三帝國師仰佛日之再中慶優曇之一現混處都邑婉其秘旨每帝王分座后妃臨席鵠鷺四匝龍象三繞時熾炭待礦故對默而心降時診飢投味故告約而義領一雨溥霑於衆緣萬籟各吹於本分非夫安住無畏應變無方者孰能至爾乎聖敬日崇朝恩代積當陽初會之所置寺曰度門尉氏先人之宅置寺曰報恩軒名卿表德非擬局厭誼輦長懷虛壑累乞還山旣聽中駐久矣衰憊無他患苦魄散神全形遺力謝神龍二年二月二十八日夜中顧命趺坐泊如化滅禪師武德八年乙酉受具於天宮至是年丙午復終於此寺蓋僧臘八十矣生於隋末百有餘歲未嘗自言故人莫審其數也三界火心四部冰背棲崩梁壞雷動雨泣凡諸寶身生是金口故其喪也如執親焉詔使弔哀侯王歸贈三月二日冊謚大通展飾終之義禮也時厥五日假安闕塞緩及葬之期懷也宸駕臨訣至午橋王公悲送至伊水羽儀陳設至山龕仲秋暨望還詔乃下帝諾先許冥遂宿心太常卿鼓吹導引城門郎護監送喪是日天子出龍門泫金餽登高停蹕目盡迴輿自伊及江扶道候哀幡花百輦香雲千里維十月哉生魄明卽舊居後岡安神啓塔國錢嚴飾賜逾百萬巨鐘是先帝所鑄羣經是後王所錫金榜御題華旛內造塔寺尊重遠稱標絕初禪師形解東洛相見南荆白霧積晦于禪山素蓮寄生于坐樹則雙林變色泗水逆流至人違代同符異感百日卒哭也在龍花寺設大會八千人度二十七人二祥練縞也成就西明道場數如前會萬廻菩薩乞施後宮寶衣盈箱珍價敵國與寵貴佑供巡香其廣福博因存沒如此日月逾邁榮落相推於戲法子永戀宗極痛慈舟之遽失恨湧塔之遲開石城之歎也不孤廬山之碑焉可作竊比子貢之論夫

子也。生於天地。不知天地之高厚。飲於江海。不知江海之廣深。強名無迹。以慰其心。銘曰。
額珠內隱。匪指莫効。心鏡外塵。匪磨莫照。海藏安靜。風識牽樂。不入度門。孰探法要。倬哉禪伯。獨立天下。
功收密詣。解却名假。詣無所得。解亦都捨。月影空如。現於悟者。無量善衆。爲父爲師。露清熱惱。光射昏疑。
冀將住世。萬壽無期。奈何過隙。一朝去之。嗟我門人。憂心斷續。進憶瞻仰。退思付囑。盡不離定。空非滅覺。
念茲在茲。敢告無學。

元識闍梨廬墓碑

夫孝者。法象乎天地。感通乎鬼神。故愛敬之中。又有真報。哀戚之外。更追冥福。元識禪師。其人也。厥姓桑。
氏其先長樂人。漢尙書洪之後。曾祖梁州刺使。諱千秋。祖貴鄉令。諱信。考文林郎。名爽。自前代無違德。基
於累仁。是生達者。禪師智周萬物。而理證本無。願度四生。而見滅諸。有以爲空。不離色體。念子之慈業。不
忘緣起。思親之孝。乃於萬山北陌。榮陽東原。葬先考文林府君。先妣太原王氏。負土成墳。結廬其域。置義
井。取施無求報。鑄洪鐘。取聞而悟道。修古寺。造尊容。取觀相生信。若夫信生攝攝。生靜靜。生定。定生慧。於
生滅處。得常住心。於虛空中。立一切法。其定慧之門乎。禪師昔宴坐介山。羣虎自擾。今經行宰樹。四衆依
德。至人凝寂。雖罕見全象。識者餘論。亦時存一隅。篆美豐石。寄詞短偈。云爾。

邈矣上德。行密道高。哀哀父母。生我劬勞。禪心護念。神足遊遨。苦河雖廣。曾不容舠。甘井既渫。利物無竭。
不增不減。不流不滯。仁靜而鑒。智動而悅。華鐘旣鏗。雄雄法聲。如來如去。如滅如生。不有奚得。不爲胡成。

寶地嚴飾。金山晃耀。善惡無門。惟人所召。境因心起。理憑思照。慇哉一心。混成衆妙。

贈陳州刺史義陽王神道碑

昔高祖之起唐侯。革隋命。太宗之威四海。正萬邦。作藩帝家。用建王國。二十一族。堯之昭也。十有一宗。文之穆也。王諱宗字某。文帝之孫。紀王之子。龍種異氣。鳳毛秀色。仁義天啓。德威日就。學無不探。藝無不究。故齊王之胤。以爵推恩。周公之子。以才分政。總角封義陽郡王。弱冠拜歸州刺史。又守檀州。又撫沂州。若赦之舊。荆人是懲。單于之衝。胡馬自遠。淮沂其父。邦國不空。遭王運中微。投於南海。書稱大去。憫失土之諸侯。禮不逃誅。義無辜之王子。某年月日。遘六道酷吏。薨於桂林之野。春秋五十。神龍之初。興廢繼絕。追贈陳州刺史。王生不得志。沒受遺榮。信乎才之短長。不如命之豐約。德之輕重。不如藝之厚薄。有美季子豫州刺史行休。髫髮羈孤。託身炎厲。貌是餘慶。巋然獨存。泣血上請。迎喪遠裔。開元四年二月至桂林。王同氣三人。往偕遇禍。殯殮無主。封樹缺如。歲月茫茫。盡爲野草。問隣母而失處。訪樵童而莫識。議者以爲不可復得。宜招魂而葬。行休拊心蒼昊。誓不徒還。乃掃亭館。設地席。潔齋懇惻。覩乎幽報。遂憑夜勞像。曲示其端。夢魯王乘舟。舟分爲兩。旣而適野。見東洲中斷。因忽悟焉。陰隱微明。率此類也。又靈堂鑾輦。一夕自屈。管上有三指回迹。一奇二並。其傍鐵生文理。布列成卦。衆駭其異。使善易者張法蓍之曰。屈者於文爲戶。出指者於義爲指蹤。一奇二並。三殯近闕。若引渦山揆之。可以察先王之心矣。考夢協吉。定處寔辰。以其月二十八日。於桂城東洲。發見神柩。舉體咸備。而一節闕焉。行休甚痛惋。若白毀裂。其夜又夢王告。

在南洛州厥明直舊殯而南十有九步沙洲痕下掘而得之安合如故他日北郭之外又併收二叔父焉於是乎驗著夢之有徵也子子三旐連舳歸飛遙遙百越經途瞻歎零桂人士以爲美談夫至孝潛通精魄昭應果虛無之見推步而有必窈冥之體尋求而致雖前誌所詳未有幽感反覆若斯之昭晰矣以某年月日陪葬於昭陵栢城妃汝南周氏祔焉禮也妃考曰駙馬都尉梁郡襄公妣曰臨川大長公主宗周元胄大君自出左右圖史循環法度邦有好逑室無偕老以王之故薨於掖宮初永昌之難王下河南獄妃錄司農寺唯有芳氏女屏屢布衣往來供饋徒行顰色傷動人倫中外咨嗟目爲勤孝王之二子配在嵩州及六道使之用刑也長曰行遠以冠就戮次曰行芳以童當捨芳啼號抱行遠乞代兄命旣不見聽固求同盡西南傷之稱爲死悌君子謂勤孝者仁之厚也死悌者友之難也感神者誠之至也此三者有以見義陽之義方賢妃之內訓繼體之崇德夫如是淳美上歸夫本朝盛烈延耀乎邦族安可闕而不飾碑版無文而已哉銘曰

高邱白雲維堯大理函谷紫氣維周柱史百代福流千齡運起富有海內貴爲天子聖帝才子於穆紀王賢王祚崩倬哉義陽慎徽九德九德有常允釐三郡三郡以康明夷於飛丹崖之下梁木其壞桂林之野不識阡陌無存松櫓予以求之人無知者哀哀孝子眷眷靈夢語妙常閭文微甄仲南洛古從東洲億中舊穸移櫨新棺改贈旣克返葬以祚山陵卜云其吉神心允憑人非地是迹謝名稱青青松柏不顯不承
贈太尉益州大都督王公神道碑奉勅撰

維天命帝子萬邦。維坤配乾。毋萬物以親九族。后父之屬尊。以敍百官。開府之班最執。謙德而光重地者。則祁國公其人也。公諱仁皎。字鳴鶴。太原祁人。王子賓天。啓靈仙之族。司徒衛漢。大忠義之門。盛德之後。仁賢繼出。曾祖景孝。隋屯田侍郎。祖詮。歙縣男。贈汾州刺史。考文洎。贈右僕射。纘戎前烈。啓迪後人。公之生也。膺汾霍之禎。體敦龐之度。禮樂狃於代襲。忠孝萌於自然。克寬克恭。不激不懶。饑窮未兆。而養之以蒙。智周無際。而處之以默。故實勝於文。行過於譽。其隱德也。三年不鳴。其會時也。一日千里。初以翊衛。調同州參軍。換晉州司馬。應將帥舉。授甘泉府果毅。遷左衛中郎將。上昇春宮。后正妃壻。擢將作大匠。事時工練。八材孔修。轉大僕正卿。驕訓車攻。六飛如舞。先天內禪。引伸外戚。懷柔畏滿。厭劇思閒。公旣深辭以職事。上亦優之以散秩。乃加特進。禮異羣公。乃拜開府儀同三司。策上柱國。封祁國公。邑戶三千。實賦三百。公於是寓情宴喜。簡跡朝行。入告嘉猷。密而人莫窺也。陰薦多士。晦而人莫知也。不自異於當路。每同塵於衆流。常語所親曰。明明天子。擇賢共理。瓊瑩姻姪。則無廡仕。不識不知。樂我而已。善矣。夫人臣位極遇莫大焉。王曰。外舅厚莫重焉。而能明道若昧。進道若退。事不事而縣解。爲不爲而理會。一以無目牛之全。一以無亢龍之悔。所謂言合古行中。權歟。後之人慎終始而保福祿者。固將沿通波而蹈高軌也。享年六十有九。開元七年四月戊寅。薨於京師。皇上悼焉。設次大臨。輶朝累日。榮之以華袞。寵之以飾終。追贈太尉。益州大都督。賜東園秘器。含襚贈錫。率加常禮。乃命尚書彭城侯劉知柔攝大鴻臚。俾之監護。京兆少尹崔琬介焉。申命詹事南安侯龐承宗持節弔祭。左庶子白知慎倅焉。公卿命士。更弔迭唁。溢巷填街。

爲之縞素。粵以十月初吉葬我昭宣公。羣官執綺袒蕕。國門如前會。夫天作聖合。必起大邦。故軒妃美於西陵。周婦表於東海。公藩衍之慶。祥脣二十。或哲或謀。或肅或乂。永錫之類也。如是元女祥發。望雲業參。練石內被。螽斯之德。外偃關雎之化。門風之至也。如彼長子。惟力戴君。畢心禦侮。奉雲雷之會。懸日月之功。庭訓之致也。如此高陽。有才子八族。我盈其二。武王有理臣十人。家出其兩。稽諸舊史。罕或前聞。若乃積三盛事。而重之以純德。篆於金石。垂於億萬。宜哉。其文字光華。撰錄旨要。則皇帝所爲也。詞臣奉詔作之。其銘曰。

於穆祁公。誕靈信厚。有倬其慶。天之外舅。高以卑牧。盈將冲守。忠焉孝乎。沒而不朽。人之忠孝。其德不回。天俾純嘏。大福時來。貴踰九列。榮並三台。祚之元祉。帝曰欽哉。祁公之德。柔嘉維則。令儀令色。小心翼翼。如何昊天。喪此邦式。休問其永。豐石是刻。我思肥泉。孝心罔極。

張燕公集卷十五

碑銘

贈太尉裴公神道碑

星辰懸象所以殷時布氣然而行不言之道者天也文武用才所以勤官定國然而致熙爲之理者帝也當高宗之休運任名世之良臣清九流而闢四海代天工而張帝德歷選前哲豈多乎哉公諱行儉字守約河東聞喜人也其先出乎嬴姓伯翳之後也秦則裴侯始封漢則侍中受職魏晉之代鬱爲盛門八裴方於八王聲振海內三子尊爲三祖望高士族自冀州刺史徵至公十二代中軍將軍雙虎至公六葉代無違德不隕厥門者已大王父伯鳳周驃騎大將軍光汾二州刺史琅琊郡開國公大父定高大將軍馮翊郡守襲琅琊郡公諸侯受封山河傳國天子共理循良克家考仁基隋左光祿大夫以陰圖王充仗義舊主遭時不利玉折名揚聖唐龍興旌淑勵節贈原州都督命謚曰忠蓋春秋之褒也公清明本乎世德正性出乎胎教氣潤河靈貌雄岳立仁孝之道天生而知將相之氣與年俱長以高陰爲宏文生絕事篤學累年不舉房僕射異而問焉對曰隋室喪亂家乏典籍館有良書探討未遍故少留耳梁公驚曰驥子志氣凌雲當一日千里其早爲通人之目也如是明經補左屯衛倉曹詔舉轉雍州司士遷金部戶部二員外歷都官郎中長安令明慶中與長孫太尉褚河南論及中宮廢立國家憂患有公伯寮譖行於季氏

出爲西州長史。又改金山副都護。又拜安西大都護。西域從政。七八年間。窮荒舉落。重譯向化。我之獨賢。邊之多幸。乾封歲徵爲同文少卿。尋除司列少常伯。官復舊號。爲吏部侍郎。加銀青光祿大夫。自居銓管。大設綱綜。辨職差才。審官序爵。法著新格。言成故事。上元中。長星出天。禿髮入塞。詔公爲洮州道左軍總管。又爲秦州鎮撫右軍總管。並受元帥周王節度。雖祭公有諫。耀武之士不行。而方叔帥師來威之道備矣。儀鳳二年。十姓可汗匐延都支李遮匐潛構犬戎。假擾西域。朝廷憑怒。將行天討。公進議曰。敬元敗績于茅戎。審禮免胄而入狄。豈可絕域更勦。王師今波斯王亡。侍子在此。若命使冊立。卽路由二蕃。便宜取之。是成禽也。高宗善其計。詔公以名冊送波斯。兼安撫大使。公往蒞。遺愛洽於人心。是行也。百城故老。望塵而雅拜。四鎮僉渠連營而諮詢。一言召募。萬騎雲集。公乃解嚴以反譟。託獵以訓旅。誤之多方。聞其無備。裹糧十日。執都支於帳前。破竹一呼。鉗遮匐於麾下。華戎相慶。立碑碎葉。蓋美克雋不殺而用謀。安人以德而去害。廓氣祲於地表。燁皇靈於天外。充國有屯田之頌。竇憲有燕山之銘。詢茲遠略。彼何微也。遷禮部尚書。加上柱國。又特降恩命。兼右衛大將軍。夷典秩宗。神必據我。文昌有將。天道存焉。調露中單于可汗伏念外叛。大鴻臚蕭嗣業喪律。詔公爲定襄道大總管。軍至朔州。斥候相接。匈奴故態狃刦糧以餒師。神將出奇。張虛勢以陷敵。乃僞爲轉運。伏其壯士。示羸師以緩行。隱精騎以躡迹。寇果大下。援兵奔散。驕虜益驚。自爲得色。駛此車牛。憩彼井泉。於是箱中兵起。千弩齊發。要路騎飛。一息而至。羣敵頰沛。殺傷滿野。從茲饋運。路無驚者。觀夫大漠無睨。穹廬靡所。追之逃遯。捨之憑陵。費日老師。兵家所病。公潛使緩

頗均其利心深圖既入狼意亦改及委罪衡官陰送降狀公密上其事人莫知之及如其期舉國歸附煙塵大起師徒惶惑公徐使令軍曰此是伏念執溫傳來降非他寇也俄而衡壁轅門釋縛納款帝嘉厥勳命尙書崔知悌乘驛勞軍備禮獻凱策勳之日程務挺張虔勗者行軍之偏將也訴言子營逼逐方降大軍又屬秉鈞忌才下上其手公曰雖不逮卒師之讓功猶恥二王之競力今而殺降後無來者乃封公聞喜縣開國公而伏念溫傳皆戮都市是年也伏念弟九珍擁其餘種復叛則天稱制追正宿枉贈伏念太僕卿程張諸家別故夷族君子以爲神理之不可誣也永淳九年詔公爲金牙道大總管未行遘疾四月二十八日薨於京師延壽里春秋六十有四長子貞隱早卒嫡孫參元嗣封藐視諸孤哀哀童幼高宗悼焉贈幽州都督賜凶儀還鄉喪葬官供禮部郎中監護窀穸之數率禮有加別勅留守委皇太子擇六品京官一人檢校家事五六年間待兒孫稍長成日停寵極哀榮禮之厚者澤及存歿義莫重焉太常議謚博古多能文武表式曰憲其年十月葬我憲公於聞喜之東良原禮也神龍中興朝思舊德贈公揚州大都督開元孝享宰嗣廷恩贈公太尉生不登乎台階歿追位乎霧宰序四時于地下調三光于天上聖人神教意在茲乎公志堅慮精神勇識澈藝必討本學皆覩奧又善測候雲物推步氣象鬼無遯謀靈不藏用著文集二十卷造草字數千文皆寶傳人間以爲世法又撰選譜十卷又爲軍營行陣部衆料敵等四十六訣大聖天后令秘書監武承嗣就家收進以爲秘術豈比馬卿浮華唯留封禪之草劉安虛誕空傳鴻寶之書而已哉加以汲引沉淪推獎氣類虛懷而襟帶不設宏亮而城府洞開故虎旅雲從詞林響應

若毛羽之宗麟鳳。衆川之長江河也。在選曹見駱賓王盧照隣王勃楊炯評曰炯雖有才名不過令長其餘華而不實鮮克全終見蘇味道王劇歎曰十數年外當居衡石後各果如其言在軍麾擇帳下之士則有張知運薛訥閻敬容甘元陳裴恩諒王智方呂休景劉元意引偏裨之將則有程務挺張虔勗王方翼崔智晉党金毗郭侍封劉敬同李多祚黑齒常之凡所進拔盡爲名將此則有道之人倫武侯之賞鑑也公之送波斯也入莫賀延磧中遇風沙大起天地暝晦引導皆迷因命息徒至誠虔禱徇於衆曰井泉不遠須臾風至氛開有香泉豐草宛在營側後來之人莫知其處此乃耿恭之拜井商人之化城也公在禮闈勅賜善馬及寶輦令史奔馳馬倒鞍破懼而逃罪公使召之曰知汝誤耳又平都支遮匈大獲珍異酋長將吏請遍觀焉有馬腦大盤希代寶也隨軍王休烈捧盤跌倒應時而碎叩頭流血惶怖請死公笑曰事有不意何至重玉而害人乎此又文饒之含容邴吉之仁恕也公西擒都支北降伏念前後錫馬五百匹僮三百人金銀器物三千品錦罽織皮六百段公受置庭中旬日散盡此又趙盾之待士田文之市義也若夫知人以爲本感通以爲行善貸以爲常散積以爲樂古之有道者嘗從事於斯矣公元夫人河南陸氏兵部侍郎爽之女也陸氏卒繼室以華陽夫人庫狄氏有任姒之德班左之才聖后臨朝召入宮闈拜爲御正中宗踐阼歸養私門歲時致禮媯后補天進參十亂少康嗣夏退協三從晉朝公卿列拜虞譚之母周官音注近出韋逞之家皇上臨極旁求陰政再降綸音將留內輔夫人深戒榮滿遠悟真筌固辭寵敗超謝塵俗每讀信行禪師集錄永期遵奉開元五年四月三日歸真京邑其年八月遷窆於終南山

鴟鳴堆信行禪師靈塔之後古不合葬魂無不之成遺志也長子參元官至涇鄧二州刺史聿修厥德人亡道存次子延休汾州汝水令世載文雄家傳草聖次子慶遠協律郎深達禮樂克和神人咸負長才同淪短運季子光庭侍中兼吏部尚書輔政邕熙致君堯舜孝理發乎陵廟仁澤遍乎松檜是故妻以夫榮母以子貴以尙書先贈方伯申命上公夫人舊封華陽增號晉國詩云文武吉甫萬邦爲憲上公有焉又曰彼美孟姜德音不忘小君有焉孝經云立身行道以顯父母侍中有焉合三德而爲家橫百世而濟美信可以言時稱代鏤石刊金者歟神道前銘薛令所撰且有後命俾余係述馬遷世家益孟堅之一傳劉寬表墓並伯喈之兩碑報德教忠俱傳不朽銘曰

天生亞聖祚此王國文綜九流武參七德柔遠服叛窮西盡北赫我皇靈去其盜賊仁則不遠智何不周如山之峻如川之流術與神合藝將道遊書來懸帳賦出登樓司馬軍陣官人綱紀帝嘉常伯國於聞喜室有令妻家成克子社金傳世桓珪守祀神爲上台永介邦祉

故開府儀同三司上柱國贈揚州刺史大都督梁國公姚文貞公神道碑奉敕撰

敍曰八柱承天高明之位定四時成歲亭育之功存畫爲九州禹也堯享鴻名播時百穀棄也舜稱至德由此言之知人則哲非賢罔乂致君堯舜何代無人有唐元宰曰姚文貞公者位爲帝之四輔才爲國之六翮言爲代之軌物行爲人之師表蓋維岳降神應時間出者也公諱崇字元之姚姓有虞之後遠自吳興近徙於陝今家洛陽焉烈考長沙文獻公樹勳王室建旛雋府公紈綺而孤克廣前業激昂成學榮問

日流武庫則矛戟森然文房則禮樂盡在弱冠補孝敬挽郎又制舉高第歷佐濮鄭並有聲華人爲司刑承天授之際獄吏峻密公持法無頗全活者衆進夏官員外郎郎中侍郎朝廷曰能遂掌軍國遷鳳閣侍郎監修國史兼相王府長史始則天人讓王承置醴之顧終以飛龍利見延驂乘之恩自時厥後恆當大任凡三處兵部尚書三入中書令一爲禮部尚書左庶子又肅政大夫總靈武軍兵馬又司農卿知隴右監牧使出典毫宋常越許中徐潞揚同十郡景雲初以蕃邸舊寮封梁國公食賦百室公性仁恕行簡易虛懷汎愛而涇渭不雜真率徑盡而應變無窮常推是心以御於物故所蒞必畊庶風偃鶩很化從言不厲而教成政不威而事理去思覩頌來暮聞歌旣登邦政卒乘輶睦及在宗伯神人允諧今之中書是爲理本謀事兼於百揆論道總於三台公執國之鈞金玉王度大渾順序休徵來臻懋德格天名遂身遜拜開府儀同三司崇其秩逸其志也初太夫人在堂公受任西掖頗限局禁求侍晨昏優詔旣許尋令還職公固請以泣制曰家有令弟足慰母心國有棟臣安可暫缺其後剖符江表敦諭起復衰麻外墨變棘內毀變禮中權通識所貴神龍之首與聞興復疇其非賦累讓而停夫以革故鼎新大來小往得喪而不形於色進退而不失其正者鮮矣君子曰忠不忘親仁也哀不違事義也讓功辭邑禮也濟代全名智也仁以長人義以和下禮以安上智以周身宜其光輔四帝軒冕三紀池臺琴筑優游幕齒傳爵土於祚胤保祿位於終始矣享年七十有一開元九年九月寢疾薨於東都之慈惠里皇上悼焉國人慕焉撫牀輟吟曾未云比制贈揚州大都督謚曰文貞禮也十年二月葬於萬安山之南原在疾也王人賜膳御醫視藥

於薨也中使弔臨羽儀哀送君臣之義厚莫重焉子昇弃思綴遺美以寘罔極有詔掌文之官敍事盛德之老銘功將以寵宗臣揚英烈帝乃洒恩仙翰鏤澤豐碑日月照臨於佳城烟雲變態於神道寶其文字別爲羣玉之山禁其樵蘇卽表三司之墓銘曰

源深自虞派別從吳避地魯陝居家洛都神明遠契岳瀆冥符翌聖斯偶生賢不孤仁將勇濟孝與忠俱學力攢植文鋒迅驅纔安卑位卽騁長途唯實唯有若虛若無再三軍國一二訏謨戎柄尤重王綸最樞兼司任切久政榮殊黼藻彌煥丹青靡渝以寬容物以鑒分區外或形放中恆禮拘箴雖誠口諍亦忘軀但觀渾璞誰詳瑾瑜伊谷尺寸管樂錙銖名正身遂言誠願孚方辭漢祿更辱齊組旣積而散窮懽盡娛川歸東極日去西哺上惻旒辰旁悲路衢藍田美玉荔浦明珠載廣休慶爰宏典謨豐碑乃立盛業其鋪帝念頻軫仙毫特紓鑄金刻石鳳篆龍圖七耀光動三泉澤濡銓能敍事理鬱詞敷求舊銘實慙殫恧無緬思雲霧尙想江湖有道之德其何以踰延陵之墓空此嗚呼存沒終始遐哉邈乎

唐故夏州都督太原王公神道碑

良玉禮神用之西序之器捨之南山之璞問然不有其珍也君子安命進之干城之雄退之去國之老隕然不失其正也語夫仗運以行道屬辭以比德亦何代無其人哉公諱方翼字仲翔太原祁人王周之後也王子以敗狄受姓徵君以遜世爲名司徒之濟艱難義形漢室太尉之圖舉甲心盡魏朝聞蔣濟所言則知尚書志力兄弟繼美覽周書所載則見穎川忠烈子姪皆封臣節奮揚於百代家聲藉甚於四海大

王父司徒定公秉隋氏之崇也。王父駢馬開府文公裕先朝之懿也。考特進慎公仁表王室之甥也。公門總四岳之靈帝子分五潢之氣是生時傑鬱爲仁紀公雄姿沉毅凜難犯之色虛懷信厚坦招納之量識略精斷達應變之權神守密靜堅不奪之節孝友內兆於免懷忠敬外灼於既冠加以思參造化誠合鬼神文其詩書武其韜略推此才也以從政焉永無匱矣夙遭家難哀過柴瘠京師號曰孝童王母同安長公主引貴遊之誠示作苦之端今太夫人徙居郿墅儲無斗粟庇無尺椽公躬率傭保肆勤給養黎山出田燎松蠶墨一年而良疇千畝二年而廈屋百間三年則日舉壽觴厭珍膳矣處約能久不亦仁乎在困能亨不亦智乎永徽初始宰安定誅豪暴以育人察奸宄以伸冤異政三舉清風一變除潮海都護府司馬以母疾辭職爲姜恪乘便遂徙朔州尙德府果毅歲餘王本立上書理公國之惇老不宜擯抑有詔徵還而親不待心與哀絕氣屬禮存詔御醫孟默朝夕診視免喪逾年僅堪履立樂成公東討新羅薦爲將帥詔公持節雞林道總管軍停不行授沙州刺史未至改拜肅州以爲慢防啓寇非重閒也乃大築雉堞嚴備櫓械人知有恃戎亦來威儀鳳歲河西盡蝗獨不入境隣郡湊稔提挈如雲公傾私泉以資乏引激水以立磧舉火百竈日鋪千人遂有芝草聚生豐年屢降人之詠德刊石存焉裴吏部立名波斯實取遮蜀偉威厲飛書薦請詔公爲波斯軍副使兼安西都護上柱國以安西都護杜懷寶爲庭州刺史大城碎葉街郭迴互夷夏縱觀莫究端倪三十六蕃承風謁賀自洎汗海東肅如也無何詔公爲庭州刺史以波斯使領金山都護前使杜懷寶更統安西鎮守碎葉朝廷始以鎮不寧蕃故授公代寶又以求不失鎮復

命寶代公夫然有以見諸蕃之心搖矣於是車薄啜首唱寇兵羣蕃響應蝟毛而豎公在磧西獻捷無虛歲蹙車薄於弓月陷咽麪於熱海勦叛徒三千於麾下走烏鵲十萬於域外皆以少覆衆以誠動天葛水暴漲祭徹而三軍涉渡葉河無舟兵叩而七月冰合由是士卒益勇戎狄益懼璽書下問皇靈遠燭遷夏州都督徵詣奉天宮熱海之役流矢貫臂陣血染袖事等殷輪帝顧而問之視瘡欬歔曰爲國致身乃吾親也妖賊白鐵余據平城以反奉詔與程務挺討擒之善公有發石壞城之計反風焚柵之感封太原郡公元珍寇邊受命討擊公以無甲乃發思造六片木棐袴開鉢解合畫爲虎文北至開光與虜合戰若駚猛獸蒙臯比莫之敵也胡馬奔駭獲其二駿桑乾舍利兩部來降初公善書與魏叔琬相輩公善射與趙持滿齊名帝每矚之賜比鳴輦賞深懸帳嘗獨行夜入有恠人長丈直來趣逼射而仆焉乃朽木也太宗壯之授右千牛及持滿伏法暴骸公哀而收葬爲執金吾奏劾高宗義之釋而不罪履道坦坦多如此類適將任帝夔龍爲國方虎天下膏潤羣生雲雨惜哉不辰悄焉遘侮嗣聖之際天后臨朝有凶人誣奏公廢后從兄常懷快俠司刑御史侮文矯制不名等法遷於崖州路至衡州寢疾捐館春秋六十有三垂拱三年閏正月二十九日葬於咸陽原君子曰斯才也斯望也難乎免於斯之代也周公聖而謗屈平賢而戚賣誼才而謫李廣勞而喪彼天命之糾紛此人情之惆悵神龍中興以陷酷吏例復官爵孝爲人極忠誠令德神之聽之始枉終直信矣有子故光祿少卿璵今秘書監珣皆篤行純孝慎終思遠說少也蒙會安寧堂今老矣豈能文旌墓遷司漢籍感激論都尉之書邕敍彪情追美樹楊公之碣銘曰

上德惟公氣秀才傑孝宏世美忠廣前烈日月心照江河思決難地必通暗機先徹卓犖文藝崢嶸武節歎由宰邑借恂臨郡海女避途山蛇可問師律三總軍聲六振銳氣入營長雲出陣肅將國威烜赫天外玉弩方擎雲旗卷旆天道茫茫自古多傷功存西域身棄南荒易簣中路懸棺反藏寶刀生衣玉玦無光後有才子先賢不忘

張燕公集卷十六

碑銘

河西節度副大使鄆州都督安公神道碑

公諱忠敬，字某，武威人也。軒轅帝孫，降居弱水，安息王子，以國爲姓。世高之達漢季，自河南而適遼東。高陽之受魏封，由陰山而宅涼土。高陽王同，生尚書左僕射河間公原晤。真河間，始建節將軍。西平公纈從正西平，生龍驤將軍黃門侍郎廣宗侯薛晤。微累葉勳華，載於魏史。高祖何藏器，廣宗之子也。周開府儀同三司寧遠將軍肅州刺史張掖郡公曾祖羅方。大隋開府儀同三司皇朝贈石州刺史貴鄉公祖興貴右武候大將軍涼州刺史，徙封榮涼歸三國公。考文生不仕。涼公皇運經綸，首平李軌，大舉河隍之地，遠通城郭之國。寵錫蕃庶，冠絕等夷。水出渥洼之文神馬者二千乘，山得崆峒之武朱輪者四十人。公育榮盛之門，鬱豪爽之氣。孝友天至，清華玉立。幼聚兒童，必爲軍陣之戲。長交英俊，唯談韜略之書。始以良家子僕射韋公待價引於帳下，安息軍建奇績，解褐授游擊將軍。臨洮府右果毅，復以善部統御史大夫唐公休環處之前鋒。洪源谷立異効，遷右威衛翊府右郎將兼新泉軍使。進本衛中郎將赤水軍副使兼赤水新泉兩軍監牧使。改會州刺史營田使。換松州都督防禦使。遷左司禦率兼河西節度副大使。臨洮軍使轉鄯州都督使如故。其在軍州，傾心下士，視人如子。無約而親附，不言而條理。其在農牧，大田多稼，如

英如梁思馬斯才。有驕有皇。輸力四朝。歷官三紀。名參禁衛。身任疆場。以靜摶繁。以逸待寇。我無亡鏃之費。敵有不戰之屈。茲所謂一方之干城者也。享年六十有六。開元十四年十一月二十八日寢疾終於位。知與不知。莫不隕涕。十五年某月葬於烏城之南。志公鄉。祔先塋也。公寬以御衆。卑以自牧。直而無訐。廉而無劌。朋友不聞臧否之言。家人不見喜慍之色。加以心淨三業。躬勤八戒。推是而行。何往不濟。初甘州有舍利沙多禪師道場之四果也。嘗云。檀越德充於內。神護於外。雖冒鋒鏑。永無害也。及百戰之後。啓手歸全。西州士人聞之。激厲有子仲璋。如璋。季璋。金璋。重璋。庭襲芝蘭。喪過樂棘。敬奉窀穸。備禮儀於文武。撰述家風。刻功名於金石。詞曰。

玉關氣爽。金波秋澈。涼野蕭條。寒山積雪。授靈產義。精勁才傑。孝固純深。忠惟剛烈。負羽從軍。奮飛青雲。麾幢按部。惠流時雨。總軍扶郡。入文出武。三十年間。式遏戎虜。疆場務靜。非公莫鎮。金鼓氣雄。非公莫震。神山與鉞。龍池取駿。霹靂陷營。衝風入陣。勇將知時。仁兵善持。反耕罷戰。王者之師。牧馬如雲。屯庾如坻。西軍方壯。東首長辭。振古同嗟。沒而不死。所謂明德。永傳神理。鐘鼎題門。珠玉名子。信言豐石。令問不已。

河州刺史冉府君神道碑

昔者堯舜既沒。文武將墜。天縱孔聖。誕敷皇極。于是乎恢六藝而正王道。舉十哲而闡微言。雍也爲德行之目。求也爲政事之首。吾見乎龍翰鳳雛。百代而共貫。虎符犀節。重世而增華。明德之後。知其必大。公諱實。字茂實。其先魯國鄒人也。古天子有相氏。宅於相土。實曰冉姓。蓋氏族之興舊矣。不常厥所。今爲河南

人焉。五代祖睢陽公諱道周，尚齊南康公主，位平南將軍，散騎常侍，荊州刺史，信州都督。高祖諱軫，仕梁太子左內率，荊州刺史。齊梁之間，荆巫重鎮，世善其職。江漢宜之。大曾父義城公諱黎，在梁雲麾將軍湖州刺史。入周拜驃騎開府儀同，至隋開皇中爲旭州刺史。大父黃國莊公，諱安昌，隋啓平城祚之穀璧。唐分蜀國，瑞以桓珪。其後改封於黃，授信州刺史，歷潭州總管，贈夔州都督。烈考天水郡果公，諱仁才，秩金紫光祿大夫，婚皇室，漢南縣主，經浦澧袁江陵永，凡六州刺史，偉矣哉！承嘉善慶，歷代名臣，流風載於史官，勳業藏於王府。公卽果公季子，天王自出，內稟胎教，混成之姿，外被門風，式瞻之訓，從容合度，造次皆法，生而知之孝弟也，學而知之禮樂也。德義如山，文章如泉，搢紳之士，仰爲宗焉。弱冠文學生進士擢第，遭家不造，府君捐館，五日絕漿，三年泣血，雖麻葛就禮，而欒棘加人服闋，調并州大都督府參軍事。丁太夫人憂，過哀終喪，有如前制，應八科舉策，問高第，授綿州司戶參軍，轉揚州大都督倉曹參軍，又舉四科，敷言簡帝除益州導江縣令。鴻漸二鎮翰飛三蜀，府中之孫子荆，郡內之岑公，孝用能據淮距海，我庾如坻。岷山導江入境，先歎加朝散大夫，除鄜州長史，仍加關內道支度使。去青城之洞府，來白帝之鄜畤，命服有輝，使車何重。除婺州司馬，入謝于武成殿，主上以邊庭有事，喜問陳湯，宣室清言，思逢賈誼，公召對蘊藉，謀慮深長。眷甚前席，恩加後命，因改恆州長史。于時四鎮未復，二蕃猶梗，屯田遼塞，戎馬生郊，代郡藏符，臨冀北而誠重。漢家張掖，比西河而還輕，乃徙拜涼州都督府長史，仍知赤水軍兵馬。河西諸軍支度使地壯伏龍，城雄飛鳥，位居刺史，總管三邊，公乃利澤洫，懋薰蕘，庤茭蕘，積糗糧，均轉輸，程力役，寬御

悅使授方任能人胥忘其久勞兵不遠其長道雖金方氣肅雨雪不交之地磧路沙鍾草木不植之所莫不豐滯穗于坰牧厭甘瓜于戍時朝廷賴之遷使持節河州諸軍事河州刺史仍知營田使崆峒連五郡之壤磧石控九河之源公夙奉皇華政聞行露高車未至闔境相歡旣見君子溫其如玉率性仁愛由衷易簡推是心也物感斯應覩恭肅而無兢見禮義而興行不言而庶事熙非教而羣下順故得大田多稼人和歲豐餉軍廩師處勤餘裕計偕入朝侍宴于長壽殿上謂公曰河州軍政要衝屯以最多卿以足食爲心朕無西顧之憂侑以彩幣錫以文袞及公還州也璽書勞勉王人相繼國家徑流沙梁弱水收西域護南庭連百萬之兵以濟事于外不一日而乏者則公之力也無駭入極可謂費斧父勝之杜預平吳蓋知羊叔子功爾宜登元老作貳天朝止于邊服實孤人望享年七十有一證聖元年二月十日寢疾終于官舍天子悼焉凶費喪歸悉命官給是日河湟耆老山谷羌夷反首斬面號奔州邑雖國亡子產吏哭祭遵豈云過也愷悌之化人之父母及其歿也哀亦如之信矣太夫人金城郡君隴西李氏江夏王道宗之女也宜此象服爛其盈門嗣先姑之徵音立庶姬之則範葬華旋落葉壅城隅以證聖二年正月合葬于河南之定鼎原禮也天使馬悲啓滕公之室人看鶴舞閉玉女之墳松柏接于邙山邱陵封于伊闕石麟將關華表何年有子曰祖雍景龍初擢給事中兼侍御史內供奉追惟皇考孝于奉親忠于事君恭于立身惠于臨人總是四行旁通具美貽厥孫謀以燕翼子故老之口旣絕竹帛之文又滅揚名今奈何刊石今來裔其詞曰

偉哉冉氏。世有仲弓。鐵冠繡服。給事于中。克昭遺懿。樹之家風。於皇嚴孝。高明有融。德罔不尊。藝何不涉。
嗣武先正。思文載協。建旗千里。逮君六葉。龜顧印房。蛇盤綬篋。官以勤積。業因時峻。宰號神明。祿稱親信。
驥足旣展。熊軒亦輶。邦國海康。京師河潤。出車西域。我君謀之。屯田北假。我君護之。六軍有饋。其誰度之。
一人無憂。其誰樂之。猛獸避德。均遷所莅。靈鳥依仁。霸昇執事。以今視古。名齊績類。天不憖遺。山頽此位。
隴首迴望。秦川斷腸。吏人攀紺。哀鴈隨喪。虛靈奠野。行臨惟堂。廟立邊郡。魂歸故鄉。王姬祔葬。禮之終也。
水合蛟龍。墳同石馬。地積霜露。烟攢松櫟。千載九原。高碑淚下。

贈太州刺史楊君神道碑

公諱至誠。字某。宏農華陰人也。厥初生人。爲姬伯之祖。因邑命氏。有楊侯之胤。其後東陵奮而開國。西漢
盛而移關門。廬隱隱。亘連桃塞之上。碑闕嵒嵒。蔽滿華山之下。明德之後。世有人焉。大王父隋直閣將軍。
岷蔚撫毫。道五州刺史。邢國公諱貴。大父故右衛副率。慈汾二州刺史。靜公諱譽。考故常州刺史。工部侍
郎。鴻臚卿。金紫光祿大夫。散騎常侍。太子少師。贈儀同三司。上柱國。鄭國懿公諱崇敬。若夫家聲代業。累
德積仁。故以克隆前統。光啓來葉矣。公稟純嘏之粹靈。漸軌物之名教。端操以正己。崇讓以與人。勵精以
探道。善問以毓德。學無不達。藝無不周。成童有傾矚之望。旣冠爲宗匠之表。年十三調太常挽郎。尋補路
王典籤。大夫門子。執紼橋山。王國詞人。曳裾睢苑。皆一時之選也。明慶中。詔郡國舉賢良。公對策天朝。無
能出其右者。遷太子通事舍人。再舉高第。徙國子監丞。坊監清流。才地兼擇。東朝東帶。銀牘增華。西序彰

纓環林益潤。高宗接千歲之統。嗣百王之業。封岱岳。禪云亭。稽于舊章。俟茲通博。乃除公禮部員外郎。祀事克明。大典攸序。建邦分職。得人者昌。吏曹居六官之首。丞郎盡一臺之妙。又轉公吏部員外郎。準的文昌。羽儀丹地。丁太夫人憂去職。公至行純篤。幾於滅性。雖杖經外除。而柴瘠加等。門人記其喪禮。天子憂其死孝。服畢授豳州三水令。曳尚方之鳥。鳴單父之琴。志道不矜其大才。勤政無陋其小邑。美聲流於豳籥。惠化布於周原。又應文擅詞場。舉策試天下第一。敷陳聖謨。啓沃明主。究天人之際。建皇道之極。如有用我者。其爲東周乎。朝廷納賈生之言。排汲直於外。乃拜公隴州司馬。未及赴官。遘疾卒於長安之私第。春秋若干。王祥未施於邦政。陳實近終。終於邑長。位不充德。其如命何。神龍初中。宗克復丕業。格於文祖。乃曉從臣。緬懷先正。以公二子在章綏之列。追贈公使持節太州諸軍事。太州刺史。非夫立言不朽。陰德陽報。安有藐諸孤而隆家。旣沒世而榮號者哉。夫人天水趙氏。殿中監武權公某之女也。受訓公宮。作合君子。言容資於國史。德行循於法度。六姻之內。宗焉始有輔佐之力。卒延門戶之寄。初公之捐館也。九子呱呱。哀衰喪位。賴夫人實顧實復。日就月將。徙宅依仁。闔門成訓。三十年內。八子登朝廷。交虎綏之華。門接魚軒之軫。某年日月。封梁國太夫人。景龍二年五月七日。終於長安之延壽里。間者遭家遷播。几筵靡託。而今蒙國昭洗。情禮獲申。以先天元年十月二十五日合葬於少陵原禮也。第二第三子。夫人在堂而沒。烈思勒銘頌。郎中昔嘗緒言。意感延州之許。將軍今復哀託。請深舊館之悲。高跡難名。短詞莫逮。採諸故

老恭存梗槩其詞曰。

昂昂楊君秉心泉懿。大河靈岳含光毓粹。學妙研精。文逾逸思。行爲時範。言爲故事。存蘊令德。沒揚虛位。善慶克家。哀榮乃備。嗣姑稱姒。敬妻曰冀。復有母儀。千載一致。貞墳土隴。同封此地。芳烈攸哉。金生碑字。

贈廣州大都督馮府君神道碑

夫積德垂裕之謂仁。追遠揚名之謂孝。仁則愛鍾厥後。孝則榮及其親。嘗三復于斯言。今于馮君而見之矣。府君諱君衡。其先長樂人也。釋趙歸秦。本家上黨。分燕徙越。又據高良。自遠祖榮懷化侯業。以至于大父贈荊州都督益。先考高州使君智殲。咸以勳績。建旗本郡。甲兵雄于一方。政化達于千里。君蘊含宏光大之德。守冲默安貞之志。秉難進易退之操。詣希聲若訥之道。爲而不有。故物譽難得而稱。靜以居常。故世榮無由而及。以聖歷之歲。終于本城。子幼家艱。喪禮蓋闋。夫人麥氏。備母師之六行。履先始之四德。處順思柔。以成婦道。及衛亡共伯。而魯重敬姜。誓以汎舟之詩。遵其闔門之禮。季子今冠軍大將軍右監門衛大將軍上柱國渤海郡開國公力士。始自齠齶來儀上京。旣達徒宅之懽。爰從倍年之訓。感三州之深義。易百代之因生。捨馮亭之本枝。從高溪之令族。千秋仕漢。遂去田宗。隨會在秦。別爲劉氏。遇風雲之感會。承日月之光輝。茅土答其勳庸。貂璫寵其忠信。太夫人踰越嶺嶠。就養高堂。孝子展白華之勤。慈母欣採衣之貴。精神所感。振古難儔。噫歟。孝爲忠。隱心後動。引桑藿之深誠。慕金張之周密。敬以衛主。愛以安親。而善不彰。惠不遠者。未之有也。由斯言之。則哀樂存乎心。不以至音改禍福。唯所召。不以偏覆反詩。

云魯侯燕喜令妻壽母明神勞善人而壽其母也夫人以開元十七年五月十二日壽終于京兆之來庭里舍享年八十有七天子悼先賢之晦德嘉侍臣之克孝思贈襚之未崇愴窀穸之將及于是詔贈先府君潘州刺史備禮飾終招魂合葬是歲也大享宗廟徧謁園陵錫類之恩施于卿士重贈府君使持節都督廣韶循康等一十六州諸軍事廣州大都督夫人受邑舊邦啓號南海從夫加贈改封越國夫人哀榮備于始終寵光洽于中外爲子之道何以加焉于是與兄左衛中候元璡右領軍衛郎將元珪等惟舊業之難名感新恩之薦及思建碑表以永芬芳夫毓至德以庇後嗣仁之厚者也揚令名以崇祖考孝之大者也仁爲五常之先孝實百行之首貫經教而莫比標人倫而獨出宜其鏤美金石式旌墳塚無忘清徽昭示來葉何必會稽江上獨有記孝之碑安陵廟前空傳尚德之頌其詞曰

明珠紫貝產于南國代所珍兮允矣君子不耀其德克全眞兮慶流我後高驤迴翥中貴臣兮朱幡象服寵及泉路榮其親兮孝道不隕勒銘表墓留芳塵兮

贈涼州都督上柱國太原郡開國公郭君神道碑奉勅撰

四時平分清秋之氣勁五方異俗崆峒之人武故隴上多豪山西出將其有雲龍感召星象特生金鼓登壇隱如敵國麾幢指塞自比長城得之于太原公矣公諱知運字逢時其先太原著姓今則晉昌人也本乎文王之子是爲虢叔虢或云郭因而氏焉自燕昭尊隗以築宮漢祖封亭以列國其侯于陽曲宅彼太原舊矣亭之元孫友從太原徙隴西昭帝分隴西置西平郭氏又爲郡之右族友之昆孫武威太守憲憲

之猶子散騎常侍芝俱有名跡見于魏晉則晉昌諸宗散騎之後也爾乃一門連譽時人號曰三儒四海齊名天下謂之八顧光祿派分于馬翊廷尉世茂于潁川孝則天錫釜金忠則帝章冕服仁則猛獸不害信則兒童不欺豈但介休見有道之碑洛陽聞立德之傳而已曾祖欽瓜州大黃府統軍上柱國祖才朝議郎瓜州常樂縣令上柱國父師朝散大夫上柱國贈伊州刺史磧鹵之地戎馬生郊業戰鬪而宏勳仕州縣而爲達啓莫京之繇福不在于其身積無聲之善慶必流于後嗣公太白之精雷泉之靈膺家之禎爲國而生身長七尺力能扛鼎猿臂虎口虬鬚鴟瞬射穿七札劍敵萬人子卿路逢遙識將軍之相唐舉一見足辨封侯之骨解褐以善戰授昭武校尉秦州三度府左果毅以敗敵北庭加游擊將軍沙州龍勒府折衝兼右金吾郎將瀚海軍副使尋改朝散大夫伊州長史伊吾副使以軍累破虜卽授其州刺使進當軍經略使朝廷以未愜前除且有後命遷本衛中郎將仍爲舊州軍使默啜之寇北庭也公奔命解圍軍聲大振加雲麾將右武衛將軍封介休縣開國公食邑二千戶開元二年吐蕃入隴右掠峒牧公兵以奇勝寇不復蹤積甲山齊而有餘收馬谷量而未盡歸功廟算朝議多之拜右羽林將軍持節隴右諸州節度大使兼鄯州都督河源軍使鎮西陲信國之藩屏坐北落亦王之爪牙故入奉期門出分閭寄于是料敵無備間其師老潛軍一舉大俘九曲鏃甲文劍斬馬犛牛旣獻戎捷遂頒朝賜乃兼鴻臚卿攝御史中丞封太原郡開國公加前食邑三千戶執憲摠軍典屬乘障增爵益邑遇厚恩深俄而六州羣胡相率大叛命公統隴右之騎濟河曲之師鋒鏑爭先玉石俱碎拜右武衛大將軍授一子官賜金銀器百事雜

綵于段班師臨洮。遭茲虐疾。嗟乎。匈奴未滅。宿志不伸。生也有涯。死而猶視。開元九年十月二十二日薨于軍舍。春秋五十有五。蕃夷邊鎮。血面摧心。悲慘風雲。號慟山谷。豈非良將視人如子。人亦視猶父乎。皇帝閔焉。詔贈涼州都督。米粟五百石。錦帛五百段。命都水使者張景佚。備物護葬。遵朝典也。惟公氣猛而性和量寬。而精銳沈謀。可以掩蓍。蔡雄斷可以奪鬼神。故常糟粕韜鈴。芻狗風角。然其樹恩結信。立威用武。烜赫如風濤。震盪如雷雨。戰必克。攻必取。每有奏謁。帝特稱歎。孝文之得魏尚。虜不足憂。太祖之見郭嘉。知成吾事。前後賜錦衣寶帶。文馬素女。爛其盈門。長鳴在廡。感知己之主。陳必死之力。皇情西顧。則九羌響鼓。詔書北伐。則六狄焚旗。上成聖君之元鑒。下効武臣之素節。其章也如此。夫爲人子。立廟致敬。祖考來格。不亦孝乎。爲人臣。恢疆禦侮。以勞定國。不亦忠乎。若然者。歸義方于先人。揚令名于後代可也。嗣子英傑。起復定遠將軍。左領軍衛翊府中郎將。假紫服金章。河西節度副大使。英奇朝散大夫。前尚輦奉御。英協游擊將軍。前京兆府勵行府右果毅都尉。英彥朝議郎。前左衛胄曹叅將等。或善居喪而過哀。或從王事而奪禮。則知辛賢父子繼位將軍。祭彤兄弟並參師律。志本不忘。達也而新是謀。權也。嘉此武功。創其宅兆。以十年七月葬于太原。夫人燉煌索氏祔焉。禮也。皇上念功以惜逝。厚給以遇存。有詔詞人爲其碑志。介士送葬。卽封征虜之墳。單于入朝。當祭度遼之墓。銘曰。

洸洸將軍。雄略冠羣。平西征北。震戎疊獫。亭障臥鼓。屯田饋軍。仗此白刃。致彼青雲。郭侯宴喜。旣多受祉。元牡黻衣。清廟蠲祀。鼎食金奏。炮鰐膾鯉。旣來不庭。有嚴天子。流沙博望。羽林飛騎。河曲廻兵。臨洮舊防。

手握金節。魂沉玉帳。千里送喪。三軍悽愴。詔喪禮崇恩碑義。豐生爲神將。死爲鬼雄。身世一滅。榮華萬空。祁連之墓長旌武功。

張燕公集卷十七

碑銘

右羽林大將軍王公神道碑奉勅撰

維大唐開元十五年閏九月二十三日庚申右羽林大將軍持節河西隴右兩道節度使營田九姓轉運
十副大使兼赤水大使專知節度事攝御史中丞判涼州都督上柱國晉昌伯薨于翬筆亭故也夫事君
効命之謂忠殺敵榮親之謂勇干星襲月之謂氣逐日拔山之謂力有一于此名猶蓋世矧兼其四人何
間焉是晉昌所以錯落將星崢嶸山嶽者也公諱君奐字威明瓜州常樂人也父壽因公建績致位九卿
臨難守死褒贈特進審塞翁之倚伏達矟艘之浮休老而益壯沒而立名者矣公威聲發于雷泉武毅標
于峒嶺小頭銳上猿臂虬鬚龍劍摧百勝之鋒蛇矛得萬人之敵拔自行陣果有呂蒙之才拜于壇場不
爽韓信之用始仕鎮戍歷班外府及郎將中郎至軍副率雖驟移官守而恆在疆場郭知運推轂河源握
符隴右公未登一命事主將之旌麾不出十歲代摠戎之節鉞慷慨之士以爲美談于是自驍衛將軍遷
羽林大將軍旣督隴右兼統河西綰塞垣之十軍佩節制之兩印大田多稼而屯廩百億蒐乘籍馬而鐵
騎數萬迺蹈赤山焚罽幕獵清島駢犧牛喑嗚則七戎辟易烜赫則千里震動亭候恃其長城廟堂賴其
神將月獻戎捷歲行軍賞王侯無種屠狗起爲將軍戰伐有功爛羊超遷都尉前後翻飛幕下奮躍行間

跨軍典郡，腰金冠玉者，數十百人矣。每至入朝奏謁，升殿論邊山川險易，立成于聚米，攻守方略，一決于前籌。遙詔置兵，先合漢光之旨，新書從事，暗同魏武之心。故得延譽上騰，風雲鬱其氣色，恩榮下遠，日月供其輝光。當斯時也，躊躇攘袂，三垂可以氣壓百蠻，可以力制卽敍者。老子之常談，和親者豎儒之怯計，安足爲神武非常之主道哉。誓請先拔犬戎，次繫獯鬻，盡區域于西海，闢郡縣于北荒，輝皇靈于天外，圖壯節于雲閣。其事如果，曠古未儔。惟君知臣，保斯言之可復。何神與善，負厥志而無成。是年秋八月，吐蕃犯邊，瓜州失守。盜憎吾將，執致其親。公以爲背父立威，非孝也。頓兵從敵，非忠也。大義逼其忘家，方寸亂其供國，其定計也。成列而出，討賊盡狄，而退殺身忠在孝先。將之道也。公馳驛要諜，而回紇內叛，以八九之從人，當數百之強虜，然猶虓噉擊射，殺傷略半。亭孤兵盡，流矢橫及，所謂仆而餘威，折而不撓矣。嗟乎，嘗膽之憤空結，噉肝之怨莫讐。天子聞之，黯然興歎。人言以命許國，夫豈忘其言哉。苟收必死之忠，焉問不虞之過，至矣。蓋聖主推仁恕于天下，懸大信于後人，愛欲其生，懲晉侯再克之喜惡，傷其沒，抱秦伯猶用之誠。婉獨見之端，豈常情所逮。謀臣飲恩于望表，猛將感德于事外。然後任人之固，衆可知也。乃下詔追贈特進荊州大都督，禮命窀穸加常二等。死事之經也。公之伉儷曰武威郡夫人夏氏，韓母築城之智，孟光舉臼之材，拔棘解圍。三軍協其健婦，崩城慟哭，四海傷其孝妻。此又間代之一奇，一家之兩絕者也。嗣子尚衣奉御承榮，天獎賜蘭星，祥名寶禮，義形于喬梓，哀戚過于縗麻。稟訓帷堂，克持門戶，特奉恩旨，收其二蔭，飾柩玉關，歸魂上國。以十六年十月詔葬于萬年縣見子之原，鹵簿齊列，方相雙引，京尹護喪。

史官頌石千乘送葬觀驃騎之威儀十里開塋識龍驤之邱墓銘曰

合衆在仁正兵維義將爲天目國命所寄曲乃老師輕實兒戲安我封略才難不易赳赳將軍貔貅絕羣超騰白地驚翥青雲朝盛勇爵家榮戰勳衆聲飛譽帝曰予聞予聞伊何甲兵繕肅屯積萬庾馬量百谷甘心犬戎指掌獯鬻大畢當此單于可掬壯計先達王師未張城隳孤塞寇及高堂忠先孝後拒敵而亡外仇易復內變難防克日將戰呼天不假岑彭詐客張飛帳下流鏑何人交錢去馬蒼黃反覆哀哉命也美殮姑臧寵歸芷陽東都門外南登路傍高墳纍纍列樹行行父子同兆何殊故鄉詔刻金石義形意氣隱善必書殤魂不諱事弃忠在生輕節貴嗟爾明靈銜恩永慰

撥川郡王神道碑奉勅撰

珠玉無遠而登輦輶之飾寶也松栝無幽而入殿堂之構才也物貴其用人亦如之撥川王論弓仁者源出于疋末城吐蕃贊普之王族也曾祖贊祖尊父陵代相蕃國號爲東贊戎言謂宰曰論因而氏焉公有由余之深識日磾之先見陋偏荒之韋毳慕上國之衣冠聖歷二年以所統吐渾七千帳歸于我是歲吐蕃大下公勤兵境上縱諜招之其吐渾以論家世恩又曰仁人東矣從之者七千人朝嘉大勳授左玉鈴衛將軍封酒泉郡開國公食邑二千戶周語曰犬戎樹敦守終純固今其俗獷而輕死其法折而不撓故前代無降人中土無僮僕自公拔身向化首變華風澤潞之間始見戎州矣若夫河南胡苑坰牧所利每歲冰合虜騎是虜中軍必謀于元老亞將固選于時傑神龍三年以爲朔方軍前鋒遊擊使景龍二年換

左驍騎將軍開元五年兼歸德州都督使皆如故八年遷本衛大將軍改朔方節度副大使公之理兵也堅三革利五刃偶拳勇齊足力信賞罰分甘苦六轡如手千夫一心接獵猶猶蚊蚋臥沙塞如衽席薦居露食垂二十年雨畢而成師冰泮而休卒寒氣入于肌骨夜霜入于鬚髮人不堪其勤公不改其節韓公之建三城也公洗兵諾眞之水刷馬草心之山以爲外斥而叛徒安堵鄭卿之和默啜也公授館李陵之臺致饗光祿之塞以爲內候而賓至如歸九姓之亂單于也公四月度磧過白檻林收火拔部帳納多真種落彌川滿野懷惠忘亡漢南諸軍踐其計也降戶之叛河曲也公千騎奮擊萬虜奔走戡翦略定師旅方旋而延阤踰跌復相嘯聚上軍敗于青剛嶺元帥沒于赤柳澗公越自新堡奔命寇場羸糧之徒不滿五百兜醜四合衆寡萬倍公殺牛爲壘噉寇爲餉決命再宿衝潰重圍連兵躡踵千里轉戰合薛訥于河外反知運于寇手朔方諸軍壯其戰矣研摩之奔也邀于黑山口覆其精銳市惠之背也追至紅桃帳掩其輜重乳泊之會荆蘭池之狂胡木盤之役繩方渠之逋寇凡前後大戰數十小戰數百算無遺策兵有全勝是以六狄逃遁三垂又寧聲暴露于天下業光華于代載信皇威之所加亦武臣之力也故錦衣寶玉允答戎功甲第良田不承錫命語其智効未甚優寵黃頭黑齒比價齊名積戰多瘡累勞生疹恩命尙藥馳往診之晉豎以深秦醫無及十一年四月十五日薨于位享年六十有六制贈爲撥川王稱故國志其本也太常議謚曰忠由舊典昭其德也長子盧襲官封繼事業次子舊久特拜郎將十二年四月詔葬于京城之南懷遠人也太常鼓吹介士龍旆虎帳貔裘封犧殉馬吉凶之儀舉夷夏之物備長安令摠徒

以護事鴻臚卿序賓以觀禮哀榮之道極矣君臣之義厚矣有命國史立碑表墓吾嘗同寮敢陳遺烈銘曰

黃河接天清海殊壤舉世安俗拔俗誰放倬哉論侯利有攸往奮發橫絕搏空直上以衆款塞因敵立勳吐蕃萬戶吟嘯成羣精感天地氣合風雲旣封酒泉乃位將軍朔方陰塞直彼獯虜帝命先鋒闕如虓虎山北加電漢南擊鼓十數年間耀國威武我有師旅將軍鞠之我有邊甿將軍育之柳澗亡師一劍復之蘭池叛胡三戰服之武節方壯朝露不待王爵送終宿恩未改時來世去人亡物在銘勳謚忠以告四海

唐故高內侍神道碑

孝足動天義堪變地河中見三州之姓炳彼精誠南亭聞再逢之母彰茲奇事不有陰德曠代誰鄰內侍高延福者將軍力士之慈父也粵自西雲干呂東明衡璧以亡王之族處巷伯之官而將軍本繫馮亭代家南越未知父母來奉宮闈老而無子曰悲幼而失親曰苦調之悲者笙磬異器而同音貌之苦者秦胡別狀而其色從此斷金合要投漆相受承順無違日嚴生乎本性仁慈匪飾天屬由乎自成父子之名既定姓氏之目因移大將軍之家去鄭而取衛平原侯之室變郭而從甄亦猶是也旣而內侍以鴻漸登朝苒弱朱紱將軍以龍樓得主豔耀金童其訓子也溫室之樹無言車中之馬數對其事親也三牲有養志之樂百行無匪疾之憂至矣哉高氏之子也以思親之願爲展親以欲報之誠而報德神明翕而哀懇荒裔疎而慕義乃有傍求聖善提挈炎洲二紀積離萬里遙至音容莫識涕淚茫然驗七星於子心認雙環

於母臂而後深傷頓感。若墜谷而登天。蘊怨都除。類愈疎而觀日。於是盡歡二媼。兼敬三人均養之恩。咸不寐于十起。反哺之志。齊色難于一堂。羣公賀虞潭之親。天子歎馮勤之母。此復然矣。內侍事主四朝。歷官七政。專良恭肅。著美綸言。冲謙儉讓。得名朝列。年六十有四。開元十二年。終于來庭里。明年五月葬于長樂原。繼子力士喪孺慕而加等。葬盡誠而備物。義方之經。鬱爲稱首。孝德之傳。今見其人。永維先恩。追綴餘烈。若夫慈羈旅之稚童。仁也。約詩書之尊教義也。貴不居而要避權禮也。生推心而死有託信也。仁爲德本。義爲行先。禮爲身宅。信爲意田。故仁之報也。壽。義之報也。樂。禮之報也。安。信之報也。順。履。順居安。乘樂享壽。此四者。生人之偉事。自求之深致者矣。於戲。領賜冠。馳寵勢。偃蹇谷上。煜爚君傍者。豈不思景行高山。慎視前轍。如或少選亡禮。顛沛違仁。瞻言四報。咫尺千里。揚芳樹淑。其不難乎。予固春秋之徒也。懲不濫而勸不僭。義重天綱。孝崇人紀。樂諄諄之成訓。善哀哀之克子。不著倚相之書。將受邱明之恥。九原上。十月深覽碑版。傷知音。有以見古史之心也。銘曰。

高堂樂未散。重壤哀已撚。寶帳吹靈衣。金樽照塵席。苦長夜之易泯。怨寸景之難惜。刻義聲與孝心。萬古千齡傳此石。

大周故宣威將軍楊君神道碑

公諱令。字令。一太州仙掌人也。隋司徒觀王之元孫。周孝明高后之歸孫。今司衛卿之元子。維有隋接三統。建萬國。我高祖以同姓爲王。維皇周敦九族。敍百官。我諸楊以外戚而貴。公體元黃之純粹。承河山之

不緒孝乎內炳忠焉外均性與天和道合仁愛收恤孤老分產疎屬汰于周施約于妻子加以樂善而好學降尊而容衆能辨樂和思柔酒德容止可度溫溫如也文章可觀彬彬如也淵英皎穆當世碩士與之遊焉而曰君子若夫漢魏舅族有恩澤之封公卿門子有良家之侍公浮雲世祿匪石儒風究乎王道之紀綱明乎人事之終始年十九舉進士高第授潞州參軍轉千牛胄曹遷洛陽尉從班次也居無何拜朝散大夫行通事舍人俄而加太中大夫檢校天官員外郎夫行人之在周禮方國是接公修其政令帝曰余嘉郎官之著漢儀列星是應公司其典故時稱邦則國家左賢右戚一文一武以公地望羽儀寄深虎旅除宣威將軍行右衛翊府郎將佩俛從事非其好也初公時爲郎也遼戎悖逆作患幽冀皇上喚咻下人故我有神兵之役選達權靡贊之吏佐猛毅維城之師乃下制以公爲兵曹焉實有密贊軍政獨飛長策豈云卒乘輯睦戎機式序若此而既哉俾雷霆驅動剿慝殿邦威元免懷黃龍馬未汗而狄盡人未疲而兵輯者公與有力也及班師振旅冊勳踰時帝用咨有司之違古念有功之未祿將遷德命滯多敕有日矣方當翼大化增三光之明熙天秩垂九德之聲昊天不惠厲氣流行如何斯人胡不眉壽年四十一聖歷元年夏六月辛丑遘疾而卒嗚呼哀哉梁木未施子道不究呱呱稚嗣仰號蒼穹哀哀嚴親惄臨淵谷遐邇察舊暨乎欽風未識之徒罔不盡朋悲而輩歎矣天子憫然弔之以玉冊贈之以錦衾羣公傷然誅德於素旆圖像於青史粵乙卯假葬于合宮縣平樂鄉之北阜郭門十里印山西崗巒萬古之阡都邑九原之地隧寄新隴魂懷故域藐視諸孤未遑歸葬平生志事孰已焉哉厥弟五人比才連譽曰踐一獻

一循一惟一尙一等因心則友世稱萬石之間門死喪之戚吾見伯淮之兄弟僉曰我圖後事日月除乎哉龜云此地陵谷居乎哉乃布哀友生托詞懷舊跡德表墓示之來昆其銘曰

洪河南注少華西峙氤氳靈會生此君子生此君子維國之紀宣慈惠和禮樂文史敦錫崇類激揚嫋否勤然濟物若不由己克明從訓誕敷厥美修詞北闕潤色東里揮翰文昌列星順晷交戟禁衛爲王爪士允文允武翁歸是比疇曰禦寇諗軍北鄙攘狄黃龍濟師蒼兕將王元默繫公是恃帝懿乃勳將圖廡仕仇仇執憲不我力以役役大勞未受多祉景命無祿洪基中圯父兮保鬢孤子稚齒孔懷靡及凡伯瘁止陟彼邙山邱墟歲礧荒草無際羣哀所起吁嗟楊侯託居此矣沕潏綿曼德音不已久客思鄉永懷桑梓

唐元城府左果毅贈郎將葛公神道碑

公諱威德字某曰葛氏京兆涇陽人也其先贏姓咎繇之後夏有葛伯氏族興焉寧陵之傍尙傳侯國綏山之下獨有仙祠嬰則威服五城襲則績稱二縣鴻臚秀於吳會散騎崇於晉景在其子孫是宜繁矣公生而開朗長而英拔非因馬鄭之學動合禮經不待孫吳之書暗同兵法有拳勇尙氣槩顧盼稜華風神都爽五馭善於東野六射勁於西霜少以嫖姚之才入充供奉之選御橋驂駕犯清蹕而不驚輦道啼鳥應鳴弓而自落便蕃左右星歲重深賜上柱國拜元城府左果毅天下大定李廣之用無施雲中薦賢馮唐之言已老春秋六十五神功二年某月終於洛師藁殯邙阜夫人太原郡王氏夫人郭氏實生大將軍福順一見聖主再紐乾綱重位冠乎北軍茂功藏乎南史故象服臨祭魚軒以朝天子深嘉歎馮勤之母

羣公列拜賀虞潭之親享年七十五薨於京兆之三真里公愛敬奉親軌則可移於後代義方訓子福祿來及於先人葬有日矣乃下制曰禮著飾終情惟悼往詢諸前烈抑有舊章前左羽林大將軍葛福順亡父某守其謙素宏此藝能未展才術奄從凋殞而嗣子克家式昭勳業旣念功以追遠亦自葉而流根宜申獎贈俾慰泉壤可贈遊擊將軍守右驍衛翊府郎將開元九年二月九日葬我郎將君前夫人王氏後夫人郭氏祔焉禮也章帝以襚輶旗在列廟食備其牲牢法葬陳其簫鼓孝慈之道著矣哀樂之禮畢矣尋彼生平之事忽如絕光繫乎碑版之文永存遺烈銘曰

硜硜都尉角立傑豎神銳玉劒氣雄金鼓六藝爰設射馭爲武百行雖名忠信爲主時不兼命位不充才善流慶答身謝榮來太原棣棣寓惟嘉偶羽林桓桓克大其後

唐故廣州都督甄公神道碑

君諱亶字道一中山無極人昔胡公紹舜奄有大邦楚子縣陳逃威樂土當烈王之王也有陳通奔周王以爲忠將美其族言舜居陶甄之職命爲甄氏錫姓因生如堅之讀形聲轉注以真爲音處則稱劉明歸晉者以異變而爲郭蓋承號者有馮通之裔邯仕漢爲太保大司馬承陽侯邯十六代而生^昌仕齊爲太山太守司隸校尉無極縣伯撰笑道論行於代鸞生隋汾州刺史族生隋沁州刺史紹紹生隋新市令協協生單于大都護府錄事參軍贈宋州刺史封惟祖惟曾在商在夏世濟其美永觀厥成君卽宋州府君之第四子也博綜經史脫略流俗情之所遺對咫尺于千里氣之所重輕百金于一諾曰興曰比階應

劉之閫奧或草或真藏鍾張之筋骨譽滿鄉曲聲聞闕庭天后臨朝再加寵命皆辭以親老不赴逮疾革易簣骨立廬墓復有制徵焉刺史獨孤楚率府寮敦喻起于墳左乃授左金吾中候生盡其養豈違親許人沒盡其哀方委身殉國或用或舍有以見大君之仁時止時行有以觀大孝之節君臣之際其遠矣哉尋除左千牛長史檢校武始軍長史攝右臺侍御史兼靈武道行軍長史攝右屯衛郎將副臨洮軍使轉右驍衛右郎將爲臨洮大使拜蘭州刺史兼榆林臨洮等軍大使除夏州都督兼鹽州防禦使徵授幽州都督衣之以紫攝御史中丞爲河北軍州節度大使君政成周月惠則在人患是緩風表以去職未幾復除夏州都督屬山戎矯虔淑擾王略兵落天上思迴行以出奇虜墮計中守便宜而未進時以爲逗遛貶撫州刺史朝廷明此舉也未到官遷廣州都督兼嶺南按察五府經略討擊使春秋五十有七開元五年七月二十八日終于官舍以年月日歸葬于恆陽之王公山南原不忘本也君三承辟命再攝憲曹八典戎旅五司藩翰事之去就所歸必執其中職之高卑爲政各當其選觀夫果于事喻于義下學而上達強立而知類畏克厥愛道無常師有商也之文有求也之藝習禮必本飾之以精華積行必崇茂之以枝葉以此探蹟則投刃皆虛矣以此効官則操刀必割矣是故羣士之所鞅掌而君之所綽約常情之所戚戚而君之所蕩蕩由是言之檜榆之與海運鳴琴之與星入從可知也惜其志懷慷慨雅多大略援桴作氣有七縱之能孤劍無前當萬人之敵竟不得橫絕漠聘雄算刮狼星之祲鏡乎太清卷瀚海之波靜而可掃駿髮之足受羈騏驥之途堂堂之貌不畫麒麟之閣彼哉彼哉有遺恨矣其孤某等望兮不至求兮不

得永懷揚名庶慰罔極銘曰

有鱗在下陶復河濱元女作合相攸于陳楚爲不道祚以永淪周寵忠節氏以初因不惟承陽致君論道施及無極建家載考彼汾彼沁伊時之寶宰兮牧兮亦孔之好積慶潛演俊乂挺生標格磊落氣志清明八司戎事厥謀有成五刺方伯厥政有聲山有杞梓工思其度國有孫吳君思其略弃德珠浦遺氣沙漠惜哉不當今也可作恆岳臨北滹沱注東仁不忘本孝亦令終壽堂盤薄牧子克窮勤美松隧穆如清風

